



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 8

Yangia anidakangma :



TAPAK 7



North Korea-i ano missile ana tendang

Regional security atema Central Asia den amaliteptsüla: PM Modi



VOL. XIX NO. 105 (ADOK 105) DIMAPUR ROGONÜ (FRIDAY) AENJETI (JANUARY) 28, 2022

₹ 5.00

Sovima nung Regional Centre for Sporting Excellence lapokogo



Sovima village nung Regional Centre for Sporting Excellence lapoktsüba mapang tanogba noksa nung angur. (Dimapur, Jan. 27)

Dimapur, January 27, 2022

(TYO): Nagaland chief minister Neiphiu Rio-i Brihostibarnü Sovima village nung Regional Centre for Sporting Excellence lapoktsüogo.

Iba centre nung archery, shooting, adventure & motor sports, futsal aser cricket indang training agütsüta aser facilities lir.

"Tanü alima nung games & sports ya hobby ka dang masü saka tetoktepba wadang tulu ka kumogo. Kodang nisung kati games & sports nung temolung agütsüdir temang aser tekolok shitak ayutsü tangatetba arur. Iba ajanga saisaponger kati tashi angar aser tajungtiba akümtsü atema tenangzükba agir" ta CM Rio-i ashi.

Asenoki tangar den tokteptsü atema yimya angazüktsüla aser scientific tangatetba nung shilem agütsü metettsüla. Sorkari lanurtem ajungkettsü atema item facilities agütsür, ta paisa

metetdaksü.

Khuret aika aliba ajanga lanur asoshi mapa meinyaktsüet saka saisaponger ka nem sabang shitak magütsüra takok tajung mengutettsü ta asüba angateta sorkari facilities agütsür. Anungji lanurtemi item facilities nungi tajangzük agütsü aser kin aser state atema konang bentsür arutsü ayongzükta ta CM Rio-isa ashi.

Iba sentong nung Director General of Police, Nagaland & President of Nagaland Shooting Sport Association, T John Longkumer, Nagaland Olympic Association general secretary & Federation of Adventure & Motor Sports Associations of North East India, president, Arjuna Awardee & FIA Asia Pacific Rally champion Gaurav Gill, taoba India Football captain Bhaichung Bhutia aser Sovima Village Council chairman Sebastain Zumvu nungertemia o tatsütsü jembia liasü.

COVID-19 Nagaland: 111 dak

putet, 81 taneptsü angu & 1 asü

Kohima, January 27, 2022

(TYO): Nagaland nung Brihostibarnü nisung 111 dak COVID-19 putet, 81 taneptsü angu aser 1 asü.

Tanü putetertem züngsema Nagaland nung nisung 34,000 adenogo.

Tanü Dimapur nung nisung 61, Tuensang nung 27, Kohima nung 11, Mokochung nung 7, Peren nung 4 aser Zunheboto nung 1 dak COVID-19 putet.

Maneni, taneptsü angurtemji Dimapur nung nisung 57, Kohima nung 15, Peren nung 6, Mokochung nung 2 aser Phek nung 1 lir.

Nisung 34,059 rongnungi 31,130 taneptsü nguogo aser ibaji taneptsü angur 91.% lir.

Brihostibarnü Dimapur nung COVID-19 puteta alir ka asüba züngsema tasür ajak agi 709 kumogo, saka parnok 17 dakbo tanga tashidak liasü.

January 23 tashi nung arishi küm 15 nungi 18 tsüngda

tainlonglong 42,894 nem COVID-19 vaccine agütsüogo.

Arishi küm 18 ser temapur 7,95,861 nem COVID-19 vaccine indang dose 14,15,255 agütsüogo, ta State Immunization Officer Dr Ritu Thurr-i ashi.

Vaccine agirtemji frontline workers 61,030, healthcare workers 16,016, arishi küm 45 ser temapur 217,982 aser arishi küm 18 nungi 44 tsüngda alir 5,00,833 lir, ta paisa ashi.

Vaccine agirtem rongnungi nisung 6,08,837-i dose anaprong agiogo. Parnokji frontline workers 48,783, healthcare workers 13,591, arishi küm 45 ser temapur 183,891 aser arishi küm 18 nungi 44 tsüngda alir 362,572 lir, ta Dr Thurr-isa ashi.

Maneni, nisung 10,557 nem precautionary dose agütsüogo. Parnokji health care workers 2,173, frontline workers 7,451 aser arishi küm 60 ser temapur 933 lir, ta paisa metetdaksü.

Centre-i Feb 28 tashi Covid-19 inyakyim atsülanger

New Delhi, January 27, 2022

(Agencies): India nung Covid-19 kanga putetba ajanga Union Home Secretary-i state aser UT ajak indang chief secretary tem dangi Covid-19 azüoktsü atema mapa inyaktsü tetuyuba agütsüogo.

"States/UTs ajaki kumdangtsüla aser zübazülema malitsüla" ta Home Secretary Ajay Kumar Bhalla-i shidi zülü.

Home ministry-isa February 28, 2022 tashi Covid-19 inyakyimtem bentshitsu aser tenokdangbatem alitsü metetdaksü.

Tesem kar nung Covid tensa balaka tulu mekümi lir saka iba ya jungjunga reprangtsüla. District 400 shi ka nung hopta ka shi Covid

positivity 10% tema liasü, ta Brihostibarnü Centre-i metetdaksü.

Karnataka, Kerala, Tamil Nadu, Gujarat, Andhra Pradesh, Rajasthan nung menatepba azüoktsüla kechiyong item state nung nisung aika dak Covid puteter. Ajisiüka, Maharashtra, Uttar Pradesh, Delhi, Odisha, Haryana aser West Bengal nungbo Covid ajema kumogo ta Centre-isa ashi.

January 26 tashi nung districts 400 nung weekly Covid positivity 10% tema liasü aser district 141 nung 5% nungi 10 % tashi liasü. Anungji Covid inyakyim akangkanga bentshitsu, ta

Health Ministry nung joint secretary Lav Agarwal-isa metetdaksü.

School lapoktsü akok:

Union health ministry-i Covid inyakyim bentshitsu school tem tanaben lapoktsü atema sangdong ka agütsüta akok.

"Tsüraburtemi school lapoktsü takhangba agütsüba ajanga sorkari school lapoktsü atema mapa inyakdar. Health ministry-i expert team dang school lapoktsü atema lenmang bushiteptsü tetuyuba agütsüogo" ta osang ajanga ashi.

India nung Covid-19 ajema akümba ajanga tsüraburtemi sorkar dang school lapoktsü rongshir.

Tata Group-i Air India alizükogo

New Delhi, January 27, 2022

(Agencies): Brihostibarnü Tata Group-i Centre sorkar ket nungi Air India agiogo.

"Tata Group keti Air India meyipa aruba atema kanga pelar aser onoki iba ya world-class airline kumdaksütsü" ta Tata Sons Chairman N Chandrasekaran-i ashi.

Tata Group-i Air India magidang Chandrasekaran-i Prime Minister Narendra Modi den ajurutepa liasü.

"Brihostibarnü Air India indang 100% shares den management control M/s Talace Pvt Ltd ket nung agütsüogo. Strategic Partner-i anir Board tasen kati Air India ketdangtsütsü" ta Department of Investment and Public Asset Management (DIPAM) Secretary Tuhin Kanta Pandey-i ashi.

Yaküm October ita Centre sorkari Talace Private Limited dang Rs. 18,000 crore agi Air India yokdok. Talace Private

Limited ya Tata group indang holding company ka lir.

Iba sülen Tata Group-i sorkari 100% yokdoktsü molunga lir ta asüba Letter of Intent (LoI) ka agütsü aser Centre-i iba atema share purchase agreement (SPA) nung sign asü.

Iba tenangzüktep nung shilem ka ama Tata group nem Air India Express aser ground handling arm Air India SATS nung 50% agütsütsü.

SpiceJet promoter Ajay Singh-i aniba telok kati Air India alizüktsü atema Rs. 15,100-crore agütsü saka Tata group-i iba dang nungi sen teimba agütsü. Centre-i Air India yokdoktsü atema reserve price of Rs. 12,906 crore lateta liasü.

Air India ya Tata Group indang airline brand tasembuba asütsü. Parnoki AirAsia India aser Vistara (Singapore Airlines Ltd den külemi) nung shilem tulubalen bena lir.

Tata Group-i Air India indang

Vasant Vihar Housing colony, Nariman Point, Mumbai nung Air India Building aser New Delhi nung Air India Building agütsü.

Tang Air India indang domestic 4,400 aser international landing & parking slots 1,800 tashi lir. Bendang linüktem nunga parnok indang landing & parking slots 900 shi lir.

Tata group-i Air India indang tayimtsü 141 agiba nungi 42 tashi leased planes aser tanungba 99 ji parnok meyong asütsü.

Taoba küm 10 tsüngda sorkari Air India nem Rs. 1.10 lakh crore tema teyari agütsü aruogo. Tang Air India-i anogoshia Rs 20 crore shi akoksar.

Tata Group-i 1932 nung Tata Airlines tenzük aser ibaji 1946 küm Air India ta melen. 1953 küm Centre sorkari Air India agi saka 1977 tashi JRD Tata-i chairman inyaka liasü.

Küm 67 sülen Air India ya tanaben Tata group dangi meyipa aruogo.

PLA sepaitemi Arunachal nung lanur anir arutsüogo

Itanagar, January 27, 2022

(Agencies): Arunachal Pradesh nung Line of Actual Control (LAC) anasa arishi küm 17 tain Miram Taron samar bushitepa aruba sülen Brihostibarnü China PLA-i pa Indian Army ket nung agütsüogo.

Arunachal Pradesh nung aliba Wacha-Damai interaction point nung Chinese PLA sepaitemi Miram Taron anir arutsüogo ta Union Minister of Law & Justice-i metetdaksü.

"Chinese PLA-i Arunachal Pradesh nung lanur Miram Taron Indian Army ket nung agütsüogo. Pa dak medical examination agiogo" ta Union Minister Kiren Rijiju-i ashi.

"Indian Army-i iba ken o PLA den kanga junga osang agitep aser ozü lanur kidangi anir aruba atema kanga pelar" ta paisa ashi. Tawa tu Indian Army-i China

indang People's Liberation Army (PLA) den osang agitep aser Arunachal Pradesh nung Miram Taron samar bushitepa nung teyari meshi.

Miram Taron ya Upper Siang district kübok Zido nung lir.

"Iba nisung ya ozüng alema China lushii aru aser iba sülen pa dang asüngdangya asü, quarantine asü aser border control regulationsdak sendakba ama ayu. Pa nem teyari agütsüogo" ta China indang Western Theatre Command, Colonel Long Shaohua-i metetdaksü.

Arunachal Pradesh MP Tapir Gao aser ano MLA Ninong Ering natibo arishi küm 17 tainji Chinese PLA-i India lushii kübok Tsangpo river anasa nungi pur ao ta tai tonglokja liasü.

Xizang, China kübok Medog County nung China sepaitemi

Taron angu ta Global Times report ajanga metetdaksü.

January 18 nü Taron ya Bishing yim kübok Siyungla nungi PLA-i pur ao. Iba mapang pa aser par medemer Jhonny Yaying nati shikarii aoba liasü.

Ajisiüka Yaying bo jena arutet aser iba ketdangsurtem nem osang sangoktsü.

Taron ya India lushii nungi PLA-i pur ao ta Arunachal East MP Tapir Gao-i tai tongloktsü.

Gao-i ashiba onükji Taron tebu aser Jido nungertemia pusema nungit. Taron aser par medemer na shikarii aoba tesemji Adi nungeri alemli nungi shikariba tesem aser India lushii nung lir ta parnok ashi.

2020 küm Upper Subansiri district kübok Nacho circle nung Chinese Army-i pur aoba lanur 5 anir arutsüba kasa tesem nung tanü Minam Taron agütsüogo.

Asenoki purapitetba aser züsentetba madak kibur akümtsüla

Dimapur, Jan.27 (TYO): Asen lima nung asenoki purapitetba sobaliba sübosülemtsü, oset aser asenoki züsentetba chiyongtsütem aika lir, saka asenoki item oset aser chiyongtsü madakji kibur küma 'Intellectual Property Rights' ozüing kübok zülüoka mayur, ibayongji asenok meyong rongsen aika tangar meyong küma odagi ta tanü yangi Dimapur nung Indian Chamber of Commerce purtemi ayongba "National Conference on Intellectual Property Rights" sentong nung shisa len teyurtemi metetdaksü.

Iba Intellectual Property Rights (IPR) yangi nisung ka nem mesüra telok ka nem pei purapitetba oset, züsentetba chiyongtsü aser pei mejemba ken dena pei tenüing nung IPR ozüing kübok kibur küma zülüoka (register) ayutsü temeten agütsür. Iba jagi tangar meyong ama kümer mamshitsü aser mayoktsü asoshi tenokdangba agütsür.

Tang tashi nung Naga nung meyong tetsü tebou sobaliba sübosülemtsütem rongnung IPR ozüing kübok kibur küma zülüoka ayubaji Chakhesang nung tebur sü dang lir. Iba denji mersü kanga tashila Raja Mircha aser süngdong nung atangba bengana, ana ya Naga nungertemi Nagaland nung züsentetba chiyongtsü küma IPR ajanga Geographical Indication (GI) agütsüo.

Kodang asenoki yanglutetba aser züsentetba mesüra mejemba ken dena IPR ozüing nung kibur küma züngsendir, shingai kibur dang masüingdangi amshitsü makok. Ibayongji, nisung kari Chakhesang nungertem dang masüingdangi Chakhesang sü madak kibur küma mashimashi amshiba anema Chakhesangtsür telok kati iba nisungji anema okadak ken o agüja lir ta angazüker.

Asenoki kibur küma IPR nung tenüing zülüoktsü baji oset aser chiyongtsü dang masü saka asenoki mejemba ken, sangro aser asenoki yangluba noksa (designs), trade mark, asenoki zülüba kakak nung copyright aser tapokdak, teyangludak aser züsentetdak Geographical Indication (GI) ajak madakji asen meyong asünungji teti asen meyong asütsüsa zülüokba ajanga temeten angutsü ta iba sentong nung shisalen teyurtemisa ashi.

Nagaland nung Naga kin shia nung pei kin sü aser osettem IPR ozüing kübok kibur kümdakja zülüoktsü asoshi Nagaland Handloom & Handicraft Development Corporation ajanga inyakdagi ta angazüker.

Aotsür Aortema pei kin, kidong aser yim indang tetsütebou sübosülemtsütem IPR ozüing kübok zülüoktsü asoshi Watsü Mungdangi inyak tenzüka

angashiogo.

IPR maparen nung yaritepsü asoshi Indian Chamber of Commerce teloki Guwahati nung a Facilitation Center lapoka lir.

Tanü iba sentong nung tongti shilem agia jembirtemji Northeast Region Indian Chamber of Commerce nung Regional Director, Wb. Ishantor Sobhapandit, MSME Development Institute Dimapur nung Joint Director, Wb. Tali Longchar, Business Association Nagas nung Wb. Benthungo Kithan, Nagaland government nung Industries and Commerce nung Commissioner & Secretary, Wb. Kekhrievor Kevichusa liasü aser ICC-NE Handlooms & Handicrafts Committee nung mendenbula Padmashree Wt. Sentila Yanger nungertem liasü. Aser ano, technical session nung shisalen teyurtem rongnung NIT Nagaland nung tesayur Watsü Dr. D. Ganga, Controller General of Patents, Designs & Trade Marks Wb. Parijat Saurabh aser IP Attorney ICC Wb. P.K. Bagchi nungertem liasü.

Ano, January 28 nüa Hotel Saramati nung kasa ICC teloki asenoki yanglutetba aser züsentetbatem tanga bendang limatemi yokba inyakim aser lenmangtem teyutsüa asoshi "Export Procedures & Documentations" onük nung shisalemtepsentong ayongzüka lir.



SHALOM PUBLIC SCHOOL

Chumoukedima-797103, Nagaland
CBSE AFFILIATION NO - 1430024

VACANCY 2022-2023

1. Vice Principal, MSc (PCM), BEd. Minimum 5 year experience PGT, Min 3 years administrative experience, having team building and leadership qualities, innovative & good communication skill.
2. BSc/BA (Geography) Teacher
3. BSc (General) Teacher
4. BA/MABEd Teacher

Preference will be given to trained qualified candidate. Contact during 9am-2pm
CONTACT - 6909621687 / 9436070374 spshumokedima@gmail.com
www.shalomeducationaltrust.org

EVERY CHILD IS A STAR

Directorate of Technical Education ajanga metetdaksür

Dimapur, Aenjeti/Jan. 27 (TYO): Directorate of Technical Education, Nagaland Kohima indang office ajanga taoba mapang metetdakja aruba ama Directorate of Technical Education, Nagaland Kohima indang Conference Hall nung February 7, 8 & 9, 2022 anogotem interview agitsü asoshi academic marks nung ajemdaker application tem shimteta lir, ta sangdong ka ajanga ashi.

Shimteta aliba candidate tem aser interview agitsü atema

mapang telesa ya Department website : www.dtenagaland.org.in aser Notice board nung angutsü.

Shortlist süa aliba candidate temi HSLC nungi tenzüka document ajak original bener arutsü ajungshir aser reservation quota kübok shortlist süa aliba candidate temi BT certificate bener arutsüla, aji mesüra parnok candidature magizütsü.

Iba atema call letter balaka magütsütsü, ta sangdong ajangasa ashi.

NSCN/GPRN ajanga metongshitsür

Dimapur, Aenjeti/Jan. 27 (TYO): Naga national service nung Asür Hoshito Aye, Tatar tenüing zülüokba küm ya 1993 sernung aibelena 2003 ta zülüa lir. January 25, 2022 nü asükhü

lemsatepba nung zülüa aliba ama masü saka March 30, 1993 ta metongshia agitsü mepishir, ta MIP, NSCN/GPRN sangdong ka ajanga ashi.

Manipur Assembly election matongdang Congress MLA ka JD (U) nung denogo

Imphal, January 27, 2022 (Agencies): Manipur assembly elections atongtsü lia opposition telok Congress nungi MLA kati party toktsüba ajanga iba telok nung timtem adokdaksüo.

Bodhbarnü Imphal nung Senior MLA Khumukcham Joykishan Singh-i Janata Dal (United) nung aden.

Party maparen anema inyak ama temolung melema bilema atema Congress party nungi Joykishan Singh agiena liasü.

Bodhbarnü Khoyathong nung MLA Joykishan den pa pusemertem JD(U) nung adentsü lemtetba osang sangokja liasü.

Iba mapang JD (U) Lok Sabha MP Ramprit Mandal-a dena liasü.

"State nung nübur nem teimla aser nükla tasen ka agütsütsü asoshi national party ka

nüngdaker. Nitishji (Bihar minister aser JD (U) leader Nitish Kumar) ya India nung ajaki akhümtsübuba politician ka asünung, iba tesem (Assam) atema tajung inyaksü pa mandang lir," ta Joykishan-i ashi. "Ajiasünjng, pusemertem tetuyuba nung anidaka ni JD (U) nung adener," ta pai shisem.

Manipur Assembly elections ya February 27 aser March 3, 2022 nung agitsü.

Manipur indang Imphal West district nung Thangmeiband assembly constituency nungi Joykishan ya Congress MLA ka lir.

'Disciplinary Action Committee, MPCC' tetuyuba dak sendakba nung January 18, 2022 nü Manipur Pradesh Congress Committee (MPCC)-i iba party nungi senior MLA Joykishan agiena liasü.

Assam nung Gorkha telungpur 190 temai adokoko

Tezpur, January 27, 2022 (Agencies): Assam Police aser Tezpur nung aliba Gajraj Corps indang Military Intelligence Unit ajanga Gorkha telungpur 190 tashi temai adokdaksüo.

Gajraj Corps Intelligence Unit ajanga United Gorkha People's Organisation (UGPO) indang tongti lennirtem den osang agiteptet aser idangji parnok temai adoktsü ajungmesoa liasü.

Parnok tsüngda aiben olemtepa aruba sülen Gorkha lennirtemi prangpong bener temai adoktsü molunga liasü.

Gajraj Corps Military Intelligence Unit teloki Gorkha telungpurtem tasü itdaksü aser Assam Police o state sorkar den jembitep.

Gorkha telungpurtemi

"Assam police-i Gajraj Corps Intelligence Unit den yaritepa UGPO telungpurtem temai adoktsü atema jembia arur. State sorkar indang alizüing atongtsü aser Assam nung terenlok bener arutsü atema iba mapa inyaker" ta Army sangdong ka nung ashi.

UGPO ya 2007 klm Assam nung Gorkha nung kümzüka ayutsü atema tentetba telok ka lir. Parnok temai adokba ajanga Gorkha nungertem temi angatettepsü atema lenmang lapokoko

GOVERNMENT OF NAGALAND OFFICE OF THE PRINCIPAL GOVERNMENT POLYTECHNIC KOHIMA KOHIMA : NAGALAND.					
NO.GPK/CDTP-1/2014-2015/			Dated, Kohima the 27th Jan' 2022		
NOTIFICATION					
Applications are invited from interested candidates to undergo Short Term Training courses at Government Polytechnic Kohima. The courses are offered free of cost under Community Development Through Polytechnics (CDTP) scheme, funded by Ministry of Skill Development & Entrepreneurship (MSDE), Government of India.					
Sl.No	Name of the Course	Duration	Eligibility	Intake Capacity	Commencement of classes
1	Computer Hardware and Networking (Basic)	3 Months	Class 10 passed	30	7/02/2022
2	Carpentry and Furniture Making	1 Month	Class 8 passed	30	7/02/2022
3	House wiring	1 Month	Class 6 passed	30	22/02/2022
4	Baking and Confectionery	1 Week	-	30	15/02/2022
Important Instructions:					
1. Admission to all the courses will be on first come first basis.					
2. Registration fee of Rs.100/- will be charged (one time).					
3. Photo copy of Aadhaar Card and Passport photo will be required during Registration.					
4. Registration will start from 1st February 2022.					
For more details contact:					
Mobile Phone : 9862376252 (Coordinator)					
E-mail ID : principal_gpk@yahoo.com					
Issued by DIPR				Sd/- (ER.KEYIEKHUR RHUTSO), PRINCIPAL.	

GOVERNMENT OF NAGALAND DIRECTORATE OF SCHOOL EDUCATION NAGALAND: KOHIMA NOTIFICATION	
Dated, Kohima, the, 24th January 2022	
NO.ED/PLN/SBM/2015-16 (Pt): This is to inform all the Government and Private Schools in the State that, The Department of School Education and Literacy, Ministry of Education has launched Swachh Vidyalaya Puraskar 2021-22 on 12th January 2022 by Dr. Subhas Sarkar, Hon'ble Minister of State (Education). In which a new section on COVID Preparedness and Response has also been added, considering its implications for health, hygiene and safety of the Children.	
The best 20 schools each at the Elementary and Secondary/Sr. Secondary levels having the maximum score will be given an award of Rs. 60,000/- as additional School Grant to be utilized as per the Samagra Shiksha Guidelines for improving Sanitation and hygiene along with a Certificate of Recognition. The best 1 school in each sub-category (total 6 schools) having the maximum score will be given an award of Rs. 20,000/- as additional School Grant to be utilized as per the Samagra Shiksha Guidelines for improving Sanitation and hygiene along with a Certificate of Recognition. The Expenditure for the National Level Awards will be borne under Samagra Shiksha.	
In view of the ongoing pandemic, the window for applying for Swachh Vidyalaya Puraskar has been kept open for 3 months (January -March 2022). Therefore, all the schools are informed to participate by login to http://education.gov.in?SwachhVidyalaya?SwachhVidyalayaPuraskar2021-22 or by downloading the Mobile App, "Swachh Vidyalaya Puraskar 2021-22" from Google Play Store or Apple App Store.	
For more details kindly contact Mrs. Khriesano Nagi, Assistant Director, (Mob 9436062927), Planning Section, Directorate of School Education, Kohima, Nagaland.	
Issued by DIPR	
(SHANAVAS C) IAS Principal Director	

**GOVERNMENT OF NAGALAND
DIRECTORATE OF TECHNICAL EDUCATION
NAGALAND: KOHIMA**

NOTIFICATION

NO.DTE/ESTT/NP-13/2017 :In pursuance of the Directorate of Technical Education, Nagaland, Kohima, Office Notification NO. DTE/ESTT-NP-13/2017 Dated 26th Nov, 2021, Corrigendum dated 27th Nov, 2021, Addendum 30th Nov, 2021, & dated 18th January 2022. The shortlisted candidates based on academic marks against the subject are informed that there will be an interview on 7th, 8th & 9th February 2022 in the Conference Hall of Directorate of Technical Education, as per the sheduled given in the tabulation.

The candidates are informed to bring all the documents in original from class X (HSLC) onwards and especially those candidates shortlisted under reservation quota are informed to bring BT certificate during interview time. Failing to bring documents in original shall forfeit their candidature.

Sl.no	Name of the Candidates	Name of the Post	Date & Time of Interview	Remarks
1	Ms. Nzani A Murry	Lecturer in Civil Engineering	7th Feb, 2022 9:30am-1:40pm	
2	Ms. Pusuenla Longkumer			
3	Ms. Alike K Achumi			
4	Ms. Elizabeth V Lotha			
5	Mr. Aowati Jamir			
6	Ms. Muzilu Vero			
7	Ms. Vivi Kiso			
8	Ms. Marcia Khing			
9	Ms. Awiwe Nyuthe			
10	Ms. Neichutuo Yhome			
11	Mr. Kutuluzo Veswuh			
12	Ms. Tongpang Merenla			
13	Mr. Imkongangnen B Pongener			
14	Mr. Imlungba S Jamir			
15	Ms. Tiamenla I			
16	Ms. Khruevelu	Lecturer in Civil Engineering	7th Feb, 2022 9:30am-1:40pm	1-BT Chakhesang
17	Mr. Khruvezo Kennedy Nakro			
18	Ms. Vekrolu			
19	Ms. Mhasekol? Nienu			
20	Ms. Itolu Dazo			
21	Ms. Throniem Winkangshu	Lecturer in Civil Engineering	7th Feb, 2022 9:30am-1:40pm	1-BT Konyak
22	Ms. Theanglih Konyak L			
23	Ms. Ponglih H Chohwanglim			
24	Mr. N. Topho Konyak			
25	Mr. K Angki Konyak			
1	Ms. Tenuienla Ozukum	Lecturer in Computer Engineering	7th Feb, 2022 1:50pm-4:50pm	
2	Ms. Eyotsono Neikha			
3	Mr. M Zuchamo Odyuo			
4	Mr. Kekhriesituo Sachu			
5	Mr. Ronjamo C Murry			
6	Mr. Lithungbemo Ezung			
7	Mr. Eatesh Kumar Rai			
8	Mr. Silo Jemu			
9	Mr. Imlong Chuba A Jongbo			
10	Ms. Wetetso -u Losou			
11	Mr. Atho-o Robert Pfkha			
12	Mr. Shiluti Tsuhah			
13	Ms. Khumjila			
14	Ms. N Ajjukam Zeliang			
15	Ms. Vizokieno			
16	Ms. Tatsili Trakha			
17	Mr. Imtisungba			
18	Mr. Kaihru Chodona			
19	Mr. Mankup K			
20	Mr. Wepfuhulu Kepfoh			
21	Ms. Tiatula T Sangtam	Lecturer in Computer Engineering	7th Feb, 2022 1:50pm-4:50pm	1-BT Sangtam
22	Ms. Longtila Y Sangtam			
23	Ms. Khumjila			
1	Ms. Ruguonuo	Lecturer in Information Technology	7th Feb, 2022 5pm-6pm	
2	Mr. Meyitoshi L Jamir			
3	Mr. Imilitoshi Jamir			
4	Mr. Rajib Das Bhagat			
5	Mr. Kekhrielhoutuo Keyentsu			
1	Mr. Manu Chiero	Lecturer in Mechanical Engineering	8th Feb, 2022 9:30am-11:10am	
2	Ms. T Chubasangla Jamir			
3	Mr. Honlem Y Konyak			
4	Ms. Ejemariam Nglyeshu			
5	Ms. Nivitono Nisa			
6	Ms. Tepulu Paul Richa			
7	Mr. Naiba			
8	Ms. Kolo-u Khape			
9	Mr. Benjamin Sangtam			
10	Mr. Khriekhotso Peseiyie			
1	Ms. Tusonulu Lohe	Lecturer in Mathematics	8th Feb, 2022 11:10am-12:50pm	
2	Ms. Nutsolu Nyekha			
3	Ms. Dzuvinu Judith Kuotsu			
4	Ms. Shilumenla Imsong			
5	Mr. Kulu Kapfo			
6	Ms. Rovivono Lhoushe			
7	Mr. Mengunuo kere			
8	Mr. Pelevotuo Rikha			
9	Mr. Khruvotso Kiso			
10	Ms. Yangertola			
1	Ms. Pelhouneinu Kiewhuo	Lecturer in English	8th Feb, 2022 1pm-3:20pm	
2	Ms. Temjenkala Yaden			
3	Ms. Lito Zhimomi			
4	Ms. Jenny Kent			
5	Ms. Sungjemmenla Longkumer			
6	Ms. Vesatolu			
7	Ms. Atingla Sangtam			
8	Ms. Khriethono Lese			
9	Ms. Cukholu Nienu			
10	Ms. Sekholu Vero			
11	Ms. Hanna Phom Y	Lecturer in English	8th Feb, 2022 1pm-3:20pm	1-BT Phom
12	Ms. Tenipumei Phom			
13	Ms. H Yaula Phom			
14	Mr. Denlen Ngonyen			
1	Ms. Gajjulu	Lecturer in Chemistry	8th Feb, 2022 3:20pm-4pm	BT-Zeliang
2	Mr. Kabidung Thaimai			
3	Mr. Rampapouising Heloing			
4	Mr. Chiheuding Khate			
1	Mr. Manlem L Konyak	Lecturer in Physics	8th Feb, 2022 4 pm-4:50pm	
2	Ms. Chovelu Cukhamu			
3	Ms. Chubasangla Longchar			
4	Ms. Inzuigongle			
5	Ms. Lucy N Ngullie			
1	Ms. Lillika Sumi	Lecturer in Electrical & Electronics Engineering	8th Feb, 2022 4:50pm-5:40pm	
2	Mr. Siseyiekuo Khatsu			
3	Ms. Thunglano n Ngullie			
4	Mr. B. Lichamo Murry			
5	Ms. Alemienla Lemtur			
1	Mr. Yangtsumew	Demonstrator in Civil Engineering	9th Feb, 2022 9:30am-9:50am	BT-Yimkhiung
2	Mr. N Lakumong			
1	Mr. Visakhotuo Angami	Demonstrator in Computer Engineering	9th Feb, 2022 9:50am-11:30am	
2	Ms. Khumjila			
3	Mr. Zeviku Khatso			
4	Mr. Neikehietuo Mor			
5	Ms. Kenosenu Kintso			
6	Mr. Kelvin Odyuo			
7	Mr. Manto Konyak			
8	Mr. Samoaba Jamir			
9	Ms. Hana K Zhimomi			
10	Mr. Moasunep Longkumer			
1	Ms. Vikesele Kiso	Demonstrator in Chemistry	9th Feb, 2022 11:30am-12:50pm	
2	Mr. Chonchithung			
3	Ms. Limasenla Longkumer			
4	Ms. Tsungom M			
5	Mr. P.Mapo Konyak			
1	Mr. Pheniang P Khamniungan	Demonstrator in Physics	9th Feb, 2022 1pm-1:20pm	1 BT-Khamniungan
2	Ms. Kushe T			
1	Mr. Bipenthung Yanthan	Demonstrator in Welding	9th Feb, 2022 1:20pm-1:50pm	
2	Mr. Zhosau Vero			
3	Mr. Yuklem Konyak H			
1	Mr. Veravoyi Chotso	Demonstrator in Carpentry	9th Feb, 2022 2pm-5pm	1-BT Chang
2	Mr. Nentilo Wath			
3	Ms. Khriezaienuo Metsieo			
4	Mr. P Pangloi Konyak			
5	Mr. Pitoshe Zhimo			
6	Mr. Bedukhoyo Kezo			
7	Mr. S Yotimongba Chang			
8	Mr. Thinosekho Vielle			
9	Mr. Toshimanen Imsong			
10	Mr. Imtisukum Chang			
11	Mr. Pikato Kih			
12	Mr. Ruovituo Lese			
13	Mr. H Sao Chang			
14	Mr. Bomotakum			
15	Mr. Lisetsi			
16	Mr. Thinoneizo Yashu			
17	Mr. Krurato Sakhrie			
1	Mr. Renthung B Junglo	Demonstrator in Electrical Shop	9th Feb, 2022 5pm-6pm	
2	Mr. Aojungshi			
3	Mr. Tiakumzuk Pongen			
4	Mr. Pitoshe Zhimo			
5	Ms. Chubasangla			
6	Mr. Yonkongchuba Chang			

**(Er. M.NAKRO)
Director**

Gen Bipin Rawat tenung nung Walong-Kibithu lenmang jaloktsü

Itanagar, January 27, 2022

(Agencies): India nung Chief of Defence Staff (CDS) asür General Bipin Rawat nem tetushi agüja Arunachal Pradesh sorkari Walong-Kibithu lenmang pa nem jaloktsüo.

"General Bipin Rawat-i India indang defence ajungketba mapa tajung inyakba atema teti bilemtetsü. Pa nungtem nung Arunachal nung Walong-Kibithu road tenung ajar. Pai 5/11 Gorkha Rifles indang Commanding Officer inyak" ta Arunachal CM Pema Khandu-i metetdaksü.

Iba dak alia Raj Bhawan, Itanagar nung General Bipin Rawat Hall ta ser tenung jaloktsüo.

73 buba Republic Day benjung nung asür General Bipin Rawat'er jalatem Kritika o Tarini na online nung adenba sentong nung Arunachal Pradesh nunger nem iba hall bendanga agütsü.

Iba ya Arunachal Governor Brig (Dr) BD Mishra Ji (ret'd) ajanga lapoktsü.

Late General Bipin Rawat'er kinungertemia state Governor aser Chief Minister na dang pelaba metetdaksüo.

Raj Bhawan, Itanagar nung 12,000 sq ft large hall nung 28-pillar grand entry, porch, double ramps aser transparent full roof view lir.

73 buba Republic Day nung CDS Gen Bipin Rawat nem Padma Vibhushan agütsüo.

Mizoram nung nisung 1,756 dak Covid-19 putet, 4 asü

Aizawl, January 27, 2022

(Agencies): Mizoram nung nisung 1,756 dak COVID-19 putet aser parnok züingsema nisung ajakagi 1, 64,127 kumogo.

Taoba ghonda 24 tsüingda COVID-19 puteta alir nisung pezü asüba züingsema tasür ajakagi nisung 591 kumogo ta health ketdangsür kati ashi.

Nisung 1,756 dak putetba nungi parnok 251 tashi tanurtem lir, ta ketdangsürisa ashi.

Taoba ghonda 24 tsüingda

nisung 633 tashi taneptsü angu aser parnok züingsema taneptsü angur ajakagi 1, 52,367 lir. Tang Mizoram nung nisung 11,169 anepaludar.

Taoba ghonda 24 tsüingda 16.37 lakh tashi tendangogo.

"Bodbar tashi nung nisung 7.91 lakh tema nem vaccine agütsüo aser iba nungi nisung 6.12 lakh shi kati dose anaprong agiogo" ta state immunisation officer Dr Lalmuanawma Jongte-i metetdaksü.

HIGH SCHOOL JUNCTION BRANCH													
<p align="center">High School Junction, Vizo Commercial Centre, Kohima, Nagaland- 797 001 Email: vjhigh@bankofbaroda.co.in</p>													
<p align="center">NOTICE UNDER SECTION 13(2) OF CHAPTER III OF THE SECURITISATION AND RECONSTRUCTION OF FINANCIAL ASSETS AND ENFORCEMENT OF SECURITY INTEREST ACT 2002</p>													
<p>To,</p> <p>1. M/s. Speedwell, Prop. Mr. Impa Longkumer, S/o Masatuba Longkumer, House No.1, Block No.1, Lower Chandmari Colony, Below Cross Wonder Church, Kohima, Nagaland- 797001.</p> <p>2. Mr. Tenjuk Aier, S/o Wati Aier, House No.123, Diphupar, Dimapur Sadar, Dimapur, Nagaland- 797112.</p> <p>3. Mrs. Yangtila Longkumer, W/o Mr. Impa Longkumer, House No.1, Block No.1, Lower Chandmari Colony, Below Cross Wonder Church, Kohima, Nagaland- 797001.</p>													
<p>Dear Sir/Madam,</p> <p>Subject: Bank of Baroda (Erstwhile Vijaya Bank), High School Junction, Kohima Branch ajanga nü nem senotsü teyari agütsüba atema nai principal, interest magütsüba.</p> <p>Bank of Baroda, High School Junction, Kohima Branch-i 22.12.2021 nü nai agütsüba address dangi Demand Notice yok. Iba Notice ji na matong. Iba notice nung keta alibatem tsüinglanglen agütsür.</p> <p>Bank of Baroda, High School Junction, Kohima Branch ajanga Credit facilities ajanga nü nem No.1 senotsü teyari agütsüo aser iba ya Bank indang agreement/s and document/s duly nung aliba terms and conditions ama liasü. Annexure-I nung nai sen apuba aser agütsütsü aliba sayua lir.</p> <p>Nü nem No. 1 indang senotsü teyari agütsüba atema nai Bank nem security ama nungdakba Documents/ s / agreement/s nung Movable Properties / Mortgage of immovable properties agütsüo. Item indang osang Annexure-II nung agüja lir. Nai Bank den agreement/s aser document/s nung sen agiba indang principal amounts agütsütsü aser ano agreement/s and Document/s nung aliba ama sen tetemloktem agütsütsü nangzüka lir.</p> <p>Temalen agüja aliba financial assistance/credit facilities dak sendakba nung nai sen shitak magütsür aser nü indang sentsühji Bank ajanga 20.12.2018 na No.1-i principal debt aser interest magütsüba ajanga Non Performing Asset ka ama züingokogo.</p> <p>Securitization and Reconstruction of Financial Assets and Enforcement of Security Interest Act 2002 (hereinafter referred to as 'the said Act') nung lateta aliba ama tashi amshia Bank of Baroda ajanga 22.12.2021 tashi nung Rs. 2,18,24,425.57 (Rupees Two Crore Eighteen Lakh Twenty Four Thousand Four Hundred Twenty Five and Fifty Seven Paise Only) den sen tetemlok tangsa agütsütsüla ta ashir.</p> <p>Bank of Baroda ajanga nenok ajak dang iba notice anguba sülen nungi anogo 60 tsüingda Rs. 2,18,24,425.57 (Rupees Two Crore Eighteen Lakh Twenty Four Thousand Four Hundred Twenty Five and Fifty Seven Paise Only) den tarutsü sen tetemlok agütsütsü aser ibaji 22.12.2021 nungi costs, charges, other monies indang contractual rates nung agütsütsüla.</p> <p>SARFAESI Act indang Section 13(13) nung aliba ama, nai Bank of Baroda, High School Junction, Kohima Branch nungi temelaba magii secured assets kecha meykodoktsü, lease mesüra tanga mapa kecha meinyaktsü noktanger. Temalen shia aliba onüktem tashi mangara SARFAESI Act indang Section 13(13) nung nai aibelenba asütsü aser SARFAESI Act nung Section 29 kubok temerenshi alitsü.</p> <p>Iba nung Act Section 13(2) nung aliba ama iba sangdong agütsür.</p>													
<p>ANNEXURE-I</p> <table border="1"> <thead> <tr> <th>Sl. No.</th> <th>1. Nature of facility</th> <th>Amount Sanctioned (Rs.)</th> <th>Amount Claimed as on 22.12.2021 (Rs.) repayable by you</th> </tr> </thead> <tbody> <tr> <td>1</td> <td>Cash Credit A/C No. 65550500000008</td> <td>1,80,00,000/-</td> <td>Rs.2,18,24,425.57</td> </tr> <tr> <td colspan="3">Total Amount as on 22.12.2021</td> <td>Rs. 2,18,24,425.57 (Rupees Two Crore Eighteen Lakh Twenty Four Thousand Four Hundred Twenty Five and Fifty Seven Paise Only) together with further interest thereon with effect from 22.12.2021 at the contractual rates together with costs, charges, other monies until payment or realisation.</td> </tr> </tbody> </table>		Sl. No.	1. Nature of facility	Amount Sanctioned (Rs.)	Amount Claimed as on 22.12.2021 (Rs.) repayable by you	1	Cash Credit A/C No. 65550500000008	1,80,00,000/-	Rs.2,18,24,425.57	Total Amount as on 22.12.2021			Rs. 2,18,24,425.57 (Rupees Two Crore Eighteen Lakh Twenty Four Thousand Four Hundred Twenty Five and Fifty Seven Paise Only) together with further interest thereon with effect from 22.12.2021 at the contractual rates together with costs, charges, other monies until payment or realisation.
Sl. No.	1. Nature of facility	Amount Sanctioned (Rs.)	Amount Claimed as on 22.12.2021 (Rs.) repayable by you										
1	Cash Credit A/C No. 65550500000008	1,80,00,000/-	Rs.2,18,24,425.57										
Total Amount as on 22.12.2021			Rs. 2,18,24,425.57 (Rupees Two Crore Eighteen Lakh Twenty Four Thousand Four Hundred Twenty Five and Fifty Seven Paise Only) together with further interest thereon with effect from 22.12.2021 at the contractual rates together with costs, charges, other monies until payment or realisation.										
<p>ANNEXURE- II</p> <p align="center">(Details of mortgaged property of the Borrower)</p> <p>All that Part and Parcel of land and building measuring an area of 5600 Sq.ft., under Patta No.4626, New Patta No.7337, Plot No.1893 located at Cross Wonder Church, Lower Chandmari, Kohima, Nagaland- 797001, which is bounded as follows:</p> <p>East: Government Quarter, West: Chandmari Ground, North: Plot of Ms. Mala Sharma, South: Government Quarter</p>													
<p>Date: 28-01-2022</p> <p>Place: Kohima</p>													
<p align="right">(Authorised Officer) Bank of Baroda, High School Junction Branch, Kohima</p>													



TIR YIMYIM

YIMOBILEM (EDITORIAL)

DIMAPUR ROGONÜ, AENJETI(JANUARY) 28, 2022

Kibur jangjaba putu

Asenok sobaliba nung tajungtibaji temulung lemtetba ya asütsü. Atangji, asenok tetsü tebou mapang zülutsü aser azungtsü memetetba ajanga ken o aser otsü oren kecha tezüluba nung mamshi aser ali kimong madaka ajaki mulungtepa arlong azungba dak alaka, tanü asüng ama, tezüluba nung kuli kaket kecha mayu. Aji oda, asenok dak temulunglemtetba teindang shisatsü tajung aliba agi, tanü putu nunga asenoki azungtsü aser zülutsü koka liaka, bendang semer na meyoktepa alidak town-tem nung dang ashi, yimtak yimtsung nungbo akhi tsürabur mapang ama arlong agidang ali kibur jangjatsür. Ajisüaka, tanü putu nungbo ali kimong madak kibur küma tezüluba nung ayuba dang masü saka asenoki purapiteta yanglutetba oset aser sübosülemtsü, asenoki züsentetba aser yanglutetba chiyongtsü, asenoki mejemba ken aser sangro aser asenoki züluba kaketem ajak madak kibur kümküma jangjatsü atema Intellectual Property Rights mekaa ayur. Aji oda, ali kimong madak kibur akümba temetenji "Immovable Property Rights" asütsü aser asen kolok nungi adoka yanglutetbatem madak kibur akümba temeten ajakji "Intellectual Property Rights" lir. Joko lia lia, tanü putu ya maparen ajak nung akhi putu ama masü angati kecha mangur, iba jagi mapa ajak nung kibur jangjatsübaji kanga tongtibang kümogo. Iba amaji ka mesüi asenoki asen meyong rongsen süaka asen meyong masü ama toktsüra, tangari parnok meyong ama küma, oda odabo asen meyong ser nung parnok dangang temelaba meshir amshitsü aser ayoktsüsa akümtsü. Atangji, asenoki yanglutetba aser züsentetbatemji, kechisüdir süaka, Intellectual Property Rights ozung kübok kibur küma zülüoka alitsüla ta masü, ajibo asen mulung. Ajisüaka, asenoki meimlaika tsüngkotepsü ya tangar kin kati parnok meyonga ta ser alima ajunga nung ayok tenzükra mesüra sentong tongtibang nung tetsür tebur sü mebendangi amshi tenzükra, koda asütsü? Longkhum nung züsentetba bengana ya tanga lima nung züsentetba ama kümer tangari alima sünga ayok nungbo koda? Aliba züngi, Salulamang nung atangba jemben, Longsa mersü, Mopungchukit aser Tulilen adokba süngo, Liroyim aser Medzephima nung atangba chiru, Süngratsü nüushi, Changki sü, Akhoya sü, osak nung aremba sürem sü, Aor Aotsür kin kidong balala sü, watsü sü, asenoki atakba molok motok aser yangluba osettsüset aser noksatem, Naga nung kenteneritemi mejemba ken, kaket zülurtemi züluba kaket aser asenoki mejemba sangrotem ajak madak Intellectual Property Rights ozung kübok zülüokba ajanga alimai shitakba kibur jangjatsü aser nungdak dang kiburtem denji dang tongteprateptsü. Tanü asungbo asenoki yangluba oset aser züsentetba chiyongtsütem ayoktsü atema tsüngdong talirtem bushia senzütsü nungdak madoker, item ajakji internet nung Import-Export sabang ajanga metetteper aser reprangdangtsü mesüra tendangtsü atema 'sample' kar yokerbo ,joko, shishilembateptsü tenzükra. Atangji, government aser shishilembabaren nung tongti shilem agirtemi ayongzükba 'International aser National Trade Fair' ama nunga aseni yanglutetba oset aser chiyongtsütem bener oa talinertem dang sayur. Iba amaji, jembia jembia, shitakba alima tilaka dang kümogo aser akhi ama masü, maparen ajak tsüngdong ajurutepa mejembii dang online nung temadoker. Iba ama putu ka nung asenok meyong temetetba, teyanglutetba aser züsentetba rongsen madak kibur kümküma nendaknendaka meinyaktetra, asenok meyong rongsen agi tangar meyong rongsen akümtsü. Tanü putu ya Teyakyak Putu (Smart Generation) ta ajar. Iba jagi Smart phone amshir aser smart city indang jembir. Iba jagi asenok dang mapa ajak nung yakyaka alitsü ayongzükra. Putu tensai aginüba ama asenoki yakyaka melitetra, tangar teyakyakertemi asenok meyong ajak bener asenok ajazüka yutsür aotsü. Atangji, asen meyong sübosülemtsü tangari kenyongi mabentsüla aser asenoki yangluba osettem tangar kidang mayutsüla aser asenoki züsentetba aser yanglutetba chiyongtsütem tangar dang mayoktsüla ta masü saka asenok ajangzüktsü atema akok tashi ajaklen asenok sübosülemtsü, asenoki yanglutetba oset aser chiyongtsütem yoka takar akümtsü merangtsüla, saka tagitsü kaji, kongsa yokdir yokaka aser shibai alidir aliaka, asenoki teyanglur Tsüngrem mamaba amai, oset aser chiyongtsü madak kiburji jangjatsüla. Iba jagi tangari asenok dang nungi asen temeten aser temoatsü rakzuka bener moutettsü aser alimai asen kolok nungi adokba mapatem meteta züngshitsü. Aji oda, tanü putu nungbo tebang o nung dang masü saka tezüluba nunga temulung lemtettsüsa inyaktsü kanga tongtibang kümogo.

OLEMSABANG

TSÜNGREM DANG SENTSÜWANGSHI ASER ASEN AO KIN
(GLORIA DEI)

- Tiatoshi Longkümer, Kohima

Okila: 2022 küm ya Aoer/Naga nung Khristantem Jubilee küm lir. Taküm ya asen Naga tenemi Khrista osangtajung arur küm 150 ajungba tepela jubilee mong küm lir. Aser ABAM kübok aliba arogo ajak nung jubilee omenji, Tsüngrem dang Sentsüwangshi Süang (To God be the glory - Gloria dei) ta lir. Aji oda, Tsüngrem chirtem atema iba dang nungi tuluba onük mali. Kechiyong Tsüngremji ajak tetenzük aser tatembangji lir (He is the alpha and omega). Aser Pa sentsüwangshiji ajak dang tematiba aser tulutiba. Aser asenok taküm alibajia Tsüngrem sentsüwangshi atema alir, tanga kecha atema masü ta Isaia 43: 7 nung shia aliba asenoki angur: "Kü tenung agi ajaba nisung shia shiba kü sentsüwangshi asoshi ni yanglua lir; ni pa kümzüksü, hau, ni pa yanglu."

Tsüngrem Sentsüwangshi ya Kechi? Laishibai Tsüngrem "sentsüwangshi" indang kodang jembidir, iba ya anü tesangwa mesüra tsüngperet tesangwa ama sentsüperang, tenük agi rangloktsü makoki perangshia aliba ain taküm ka indang aiben shia angutsü. Ao nunga Sentsü- colour aser wangshi - perangshia aser wangshia, merena aliba ta angateter. Teyangluba oset aser takütem dang kheni makaba ain-tashi ka Tsüngrem dak dang alibabaji Pa sentsüwangshiji lir. Aser iba ain-tashiji Pa temeshibaji lir. Tsüngrem temeshiba ya kechi ta süra, kechi Tsüngrem masü item nungi pilaa aliba dangji Pa temeshibaji lir (God's holiness is his separateness from all that is not God) Anungji, kodang Tsüngrem temeshibaji teyangluba madak yaluoktsüdir ibaji Tsüngrem sentsüwangshiji lir (Iba tesendaktep indangji asenoki Isaia 6: 1 - 3 ji züngra angatettsü).

Kechi temeshi lir, tajung lir aser ochi aser ajemalu lir yangji Tsüngrem sentsüwangshi jungkai adoker. Alima nung aser Kotak nung teyangluba ajak atema Tsüngrem sentsüwangshiji dang chichiba ranglokdongji lir, aser ibaji dang asenoki tushir, külemer, süngmangseter, aser tenung ajungketer. Aser Pa sentsüwangshi nükshia aser aginüa bilema nungji dang asen taroktiba tepelaji angur. Anungji, Pa dang sentsüwangshi aser konang ajak agütsütsü tetemsü lir.

Meimchiri Tsüngrem Sentsüwangshi Anema Nokdakba:

Tsüngrem sentsüwangshidaktsü asoshi ajakji yangluakasa, meimchir yangluli nungi teyangluba nisungtemi Teyanglur Tsüngrem nem sentsüwangshi agütsütsü melena pei sentsüwangshi bushiba nung lia aru ta asenoki laishiba otsütem nungi angateter.

Mezüng teyangluba nisung Adam & Eva, tena Tsüngremi ashiba angaa aser Pa nem sentsüwangshi agüjaa alitsü yanglu. Saka mapang tatsü tsüngda nung Eva aser Adami Peri "Nenek atangji masütsü. Saka koba anogo nung nenoki iba süngjangji chidir nenok masütsü, saka nenok tenük lapoktsü aser nenok Tsüngrem ama tajung tamajung meteta akümtsü" ta ashiba teyazü O, sentsüwangshi bushiba oji ang, tena atema tongtipangba kümdaktsü nung, ibaji ajanga meimchir dangi atakatem aru aser Adam aser Eva Eden tsüki nungi aritok.

Ano alima ajonga Noah tzümetsung agi shitoker mapang tatsük ka dang lir, kodang alima ajak nung oshi ka aser o ka dang sür longjema liasü, parnoki longjema alitsü aser "parnok tenung ayutsü" atema Shinar lenden nung longru ki ka yanglutsü lemtet. Saka meimchiri pei tenung ayutsü merangba mapa jagi Kibuba mepeladaktsü aser meimchirtem alima sünga oshi balala lemsar senshi.

Daniel tapu 4 nunga asenoki angur, Babilion nung chuba Nebukadnezzar-i pei sasa ashi, "Iba Babilion yimli tulu koba ni chuba alidak ni yanglua lir, ya kü pei tashi tulu agi aser kü pei sentsüwangshi akhüm tulu asoshi masü no?" Koba mapang nung chubai iba o jembii iba mapang nungjisa, "ano chuba bang nung oji alidang", kotak nungi ola ka alu: "Oh chuba Nebukadnezzar, ya ne dang ashir, ne dang nungi yimlijji pilaogo, aser na nisung rongnungi aridoktsü, aser ne talidak moapu shiruru rongnung alitsü; nashi pungchi ama na kangshia rem chidaktsütsü aser meimchir yimli madak Tematibai yimsü asür, aser aji pai mulunger nem agütsür ta nai memetet tashi mapang tenetben süidaktsütsü." (Daniel 4: 31 - 32). Aser yamaji, tematiba sentsüwangshi menden nungi Pa küm 7 tashi arem shiruru ama ali aser chubai kodang Tsüngrem sentsüwangshi indang angateta Pa nangzük idangji pa tanaben chuba menden nung mendaktsü.

Laishiba nung ashir, Tsüngremi Luciefer-ji kotak tenyar rongnung tematiba jenjang nung ajungketa yanglu. (Lucifer means "morning star" or Light bringing). Saka iba tenyari teyanglur Tsüngrem sentsüwangshia alitsü melen, pai Tsüngrem den temaba sentsüwangshi nung linü. Pai pa mulungjang nung yamai ashi, "Ni Kotaki atutsü, Tsüngrem petinutem temalen ni kü chuba menden ajungkettsü, aser anüolentip tatembang nung ni telok sentepba tenem manung amentsü. Ni mepet temaleni atutsü, ni tematiba mesüka alitsü (Isaia 14: 13 - 14). Saka Luceifer-i Tsüngrem sentsüwangshi raktep nung, pa kangla tatembangba tonga, Sheol kangla tonga Kibubai pa anir alu" ta tekong 15 nungji zükua angutsü.

Aji oda, shiri Tsüngrem nem dang sentsüwangshi aser tetushi ajak magütsüi ali meimchir aser alima yimli sentsüwangshi bushir, parnok Kibubai teküboktiba jenjangi atsüzüksü aser satan jenjang nung ayutsü. Kodang teyanglubatemi Pa meyong sentsüwangshiji rakteptsü merangdir idangji taküm nung takoksa tulu ajurur, kin aser yimlitem samar, aser tematiba jenjang nungi kangla ponglai atsür alur. Kechiaser sentsüwangshi, kongang aser tetushi ajakji Kibuba meyong dang lir aser Pa asoshi dang yanglu. Rom 11: 36 nung ashir, "ajak pa dak nungi, aser pa ajanga, aser pa atema lir. pa dang teti sentsüwangshi sang! Amen." (For from him and through him and to him are all things. To him be the glory forever. Amen). Ibai tematiba tanela O-ji lir.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazüngerü angateta agitsü mepishir

Boko Haram-i Khristan aika tepset aser Tenla ki ana rongdoktsü



January 20, 2022 nü Borno state nung Chibok area kübok Kautikari jila nung Boko Haram teloki Ekklesiyar Yan'uwa a Nigeria (EYN) indang Tenla ki ka rongdoktsür aliba noksa nung angur.

January 27, 2022: January 20, 2022 nü Borno state kübok Chibok area nung Boko Haram kiralongrar teloki tetsür 17 puer ao, ta International Christian Concern (ICC)-i metetdaksü. Iba tatalokba sülen anogo ka lir ISIS den tesendaktep aliba Boko Haram teloki sangdong ka ajanga, "Onoki tetsür 17 puer aoba den Khristan aika tepsetogo aser Tenla ki ana den ki ana rongdoktsüogo," ta metetdaksü. Tenük kuli alir aser iba tesem nungji lenir, Hassan Chibok-i, "Brihostibarnü Pemi nung kiralongrartem jagi Tenla ki ka aser Khristantem amak. Parnoki nisungtem dak injang khaloktsü aser jena mouteter tetsür 17 puer ao," ta

metetdaksü. Osangbener den jembidang Nigeria nungder army otongdar, Onyema Nwachukwu-i, kiralongrartemi iba tesemji amokbangtsü meranger, ta metetdaksü. "Ozü sepaitemi parnok jenjang raksatsüba aser Boko Haram kiralongrar aika 'surrender' asüba sülen parnoki tanurtem anioka züngsem kümdaktsütsü nükjidong nung inyaker," ta pai ashi. 2014 küm nungi tenzüka Chibok nung Khristantemi mapang shia timtem ajangshia arudar. 2014 küm Boko Haram teloki school azünger tetsür 300 shi puer oa liasü. Islamic kiralongrar telok-Boko Haram-i Nigeria nung

Khristan meyrjang aika tepsetogo aser ibaji ajanga Khristan million aika jenshiogo. Parnoki Islamic Sharia ozüng benoktsü meranger aser Islam tangatetba sülen manidakertem anema inyaker. Parnoki yim aika maakogo aser Khristantem aser minorities kangshia Islam yimsü dangi meyipdaksür. "Boko Haram teloki kiralongraba anentsü aser Tsüngremi parnok melung anepa kümdaktsütsü atema sarasademjang. Kibuba atema takoksa angurtem aser reshikangshi ajangshirtem atema sarasademjang aser reshikanghi liaka Arogo tashi itshitsü atema sarasademjang," ta ICC-i mepishia metetdaksü.

England nung aliba Arogotem nung Covid tenokdangbatem agiener

January 27, 2022: Coronavirus wara ajanga England aser Wales nung küm ana jungnüa Tenla kitem nung tenokdangba balala liasü, ajisüaka wara süngjemba sülen Arogotem nung item tenokdangba aika agiendar. Joko England aser Wales nung Tenla kidang mask agitsüji pei melung asütsü aser nisung o nisung na anasatepa amentsü. Tenla kidang osangtajung ken kaket lemsatepa amshitsü akok aser lokti ken atentsü akok. Sorkari wara dak sendakba "Plan B" tenokdangbatem agienba sülen Arogotem nunga wara dak sendakba tenokdangbatem agiener. British nungder tain nütsüng timbakati coronavirus vaccine agiogo aser tang Omicron variant liaka iba variant agi shiranger aser asürtem kanga ajema kümogo. Bishops' Conference of England & Wales nung General Secretary, Christopher Thomas-i, iba wara den külemi alitsüsa nübürtem atema mapang aruogo, ta metetdaksü.

Paisa, "Iba wara ya tatembanglen kati arudar ta scientific mongintemi ashir, ajisüaka kilung nung mapang talangka lokti adenshiba nung timtem adoktsüa akok, anungji iba wara anema ajaki maneni kümdangtsü nüngdak," ta metetdaksü. "Akhi ama taküm libalirotsü saka kümdangtsü nüngdak. Coronavirus den külemi anema alitsü nüngdak," ta paisa metetdaksü. "Tenokdangbatem agienba ajanga taküm libaliro akhi ama akümtsü saka coronavirus wara maneni prokdar, anungji Tenla kidangi oa shilem agirtemi ibaji temelung nung alitsüla, kechiyong pei taküm kümzüka alitsü atema inyaktsü nüngdak," ta pai ashi. Thomas-i, England aser Wales nung putirtemi mezüngyongi vaccine agitsü atema nübürtem ajangshia liasü, kechiyong wara nungi kümzüka alitsü atema ibaji nüngdak; menatepba tashidak alirtembo kidang amongtsüla, ta ashi. Paisa, tang ama tensa ka nung Arogotemi Tenla kidang mopung sadema aodak

ayutsüla, ta ashi. Ano Kibuba benjung ketdangsüa agirtemi pei teka sanitize asütsüla aser Tenla kima temeshi tzü mapang shia melentsütsüla, ta metetdaksü. Arogo nung putir, Bastin Joseph-i, "Onok shinga den-a tsükchitepa mali, saka iba tatalokba ajanga onok süngmanger," ta metetdaksü. Parnoki aina agi agi yangluba 'case' raksatsüba sülen kürakyangluji raksatsü. Iba tatalokba sülen Khristantemi Tenla kima longkak aita liasü. Putirisa, "Police-i nisung ana pua tenaprong maitsü jangjaba atema onok pelar," ta metetdaksü.

ANOGO ABEN TSÜNGREM DEN

Kodang Tsüngremi jembidir, yamaji alir

Yamaji kü bang nungi aoba kü o alitsü: aji amajok nung kü dangi meyipa marutsü, saka aji agi ni aginüba ataloktsütsü aser ni koba asoshi yok iba nung azükarutsü. Isaia 55:11.

Kodang Tsüngremi jembidir, kecha mataloki malir, memelenshir malir. Tetenzük mapang nungi, Tsüngremi jembiba aser kecha makaba nungi alima yanglu. Tsüngremi alima yangludang Pai timi tarensena ka nung (pattern) yanglu: Pai jembi, yamaji liasü, ibaji junga liasü (Lipok 1:3-4). Ibai tarensena Laishiba ajunga jungkai adoktsü; Pai ashiba ama mapa ajak atalok aser Tsüngremi aji junga angu (Fil. 2:13). Tsüngremi tebilemba meshidang Pai jembiba mapa akümtsü ta temulungtetba Pai jembi.

Kodangsa Yisui jembi Pai jembiba ama atalok. Chitemra akettertem Yisu nungi O ka jembibaji taneptsü ta angu (Luke 5:13; 17:14). Nükpokeri Yisu nungi o ka jembibaji angutsü tenük ta angu (Luke 18:42). Yisu nungi atakatem o kaji teraksa ta nütsüngtemi mongu zü nu dong nungi angazük (Mark 11:20). Yisu o nungi temenen puri tatok angur (Yn. 8:11). Lazar shia arudaktsütsü asoshi Yisui kwiben merang? Ken dang (Yn. 11:43). Yisui jembiba o kecha matalok mali.

Yisui ne den jembidang kechi ataloker? Yisui jembiba otem Laishiba nungi azüngdang ne taküm nung temelenshiba kecha makai azünger asü? Yisui Farisitem aitsü kechiaser zülua alibaji metetba ajanga parnok nem taküm agütsütsü ta parnoki amang. Shibai oji jembi paji akatsü melen parnoki o akaba nung temulung süa liasü (Yn. 5:39). Tsüngrem nungi o kaji ne taküm nung koda tashi tait lir! Nai Laishiba azüngdang aser sarasadem dang, Tsüngremi ne taküm asoshi kechi mulung angang.

Tamil Nadu nung Tenla kidang kürakyanglu raksatsür ana puogo

January 27, 2022: India kübok Tamil Nadu state nung aliba Tenla kidang St. Sebastian kürakyanglu raksatsüba sülen anogo asemnü lir police-i nisung ana puogo. January 23 nü Ramanathapuram nung Holy Trinity Cathedral Tenla kidang mejangjaba nisung kari kürakyangluji raksatsü liasü. Arogo nung putir, Bastin Joseph-i, "Onok shinga den-a tsükchitepa mali, saka iba tatalokba ajanga onok süngmanger," ta metetdaksü. Parnoki aina agi agi yangluba 'case' raksatsüba sülen kürakyangluji raksatsü. Iba tatalokba sülen Khristantemi Tenla kima longkak aita liasü. Putirisa, "Police-i nisung ana pua tenaprong maitsü jangjaba atema onok pelar," ta metetdaksü.

Tawa Kumbakonam kübok züngsema lir. Thanjavur district nung tetsür Eastern-rite Syro-Malabar chanu ka soseta asüba dak Arogo nung lenir, Paul sendakba nung kari Allappatt-i, "Iba ya secularism kürakyangluji raksatsü asütsüa anema lir. India ya tamangba akok ta onoki melung meleme yimsü balala amanger ajak bilemer, ta police-i metetdaksü. külemi tesünep aser yimjung nung aliba linük ka lir; kong January 9 nü tetsürla jagi nung jabaso aser jala ajak kibong ka treatment tagidak mapang ama alir. Ajisüaka minorities, nungertem anema inyakba nung January 19 nü asü. Hindu talisa Khristantem aser Muslim Arogoi lapokba school ka nung kanga bulua ataloker," ta tezüngzüdak liasü aser lai metetdaksü. Khristan yimsü agizüktsü Paisa, "Yimtenren tsütsü memelungba agi nun temi la khenpiga atema tajangzük kanga merenshia liasü. angutsü atema linük nung Iba dak sendakba nung tesünep aser yimjung police-i hostel warden arrshi meraksatsütsüla," ta ayongzük. küm 62 nun, Sister Sahaya Tawa United Christian Mary apu. Forum report ajanga ashiba Kürakyanglu raksatsüba agi, Khristantem atema 2021 dak sendakba nung melung küm ya tamajungtiba küm liasü; melemi police-i apuba nisung 2021 küm linük tesem ajaklen anaji Hindu Aikya Munnani Khristantem anema inyakba (Hindus' Joint Front) nung tatalokba aika liasü.

OLONG PAITEP # 6065

	1				2			3		4
5								6		
7			8							
								9		
		10								
11										12
					13					
					14					
15										
					16					

TIPILEN		LANGTSÜNGLEN	
1. Balaka	- (5)	2. Hai sür inyak	- (4)
6. Aika shirangba	- (4)	3. Aor tenüng ka	- (6)
7. Tar tatsü	- (6)	4. Ali telungi talangka lur	- (5)
9. Nenü'er jabaso	- (4)	5. Tebang kenyongi mazüoker	- (4)
10. Sen latettsüba	- (7)	8. Ken atema anenzükertem	- (5)
11. Tangar kübok alir	- (4)	9. Toktepa noktak	- (5)
14. Lon nung inokba	- (6)	10. Sen	- (6)
15. Tzü ayimdak	- (4)	11. Benjong agi	- (5)
16. Ajok	- (5)	12. Telung nung rizünga ayu	- (4)
		13. Tebang nung enok	- (4)

OLONG PAITEP # 6064 TELANGZÜBA

TIPILEN :		LANGTSÜNGLEN :	
1. Aben, 4. Artsü, 7. Lisem, 8. Liwa,		1. Aruli, 3. Balala, 5. Suwar, 6. Belem,	
9. Sarasadem, 12. Aket, 14. Mangu,		9. Süjak, 10. Aonung, 11. Dokan,	
15. Anünü, 16. Ango.		13. Tinu.	



SARASADEM COMMITTEE SENTONG AGIR :

Chairman : Asenok ajaki sarasadem onük bendena sarasademdi.

Member1 : Asenoki tamasa yimsüsürtem aser Tsüngrem tenzükertem atema onük bendi.

Member2 : Asenoki ano tsüngsang mopung tajung den alu nung tsüksüng-ünsüng südakjang ta sarasademdi.

Rev. Alokba : Hoi adianutem, nia langka shidikor, asenokya tangar atema masü saka tzüma lenden nung aluyimertem, ak metsürtem, nashi metsürtem, broiler metsürtem, ango tzübu akartem, item ya teshirangdaksü ta sarasademtsüdi, asen Naga nunger asen sasaa peria inyakteta chiyungba maliato!

Telok : Revenbai ashibaji shitaka niiii!

Lilir : WhatsApp

TANÜBO NAI LANGZÜANG

Q. Koba technology company ajanga 'AI Research Super-Cluster (RSC)' saya?
 [A] Microsoft [B] Meta [C] Google [D] Foxconn

(Taruba adok nung onoki langzüksü)

YASHI ADOK TELANGZÜBA : Common Services Centers (CSC)

AO OSHI ANGAZÜKDAK:
TANÜ ANGAZÜKTSÜBA OJANG

Melem
 (adj) tapu masü (thick)
 * Temekong mapang nisungtemi süoshi **melemmelema** sübor.

Melemlem
 (adj) jangratema masü, teru ka mali (absence of warm feelings)
 * Tambur tantsürtem maliba agi yim **melemlem** kümogo.

Tanur asoba anogo nung salem osang den noksa angati adokdaksünura - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimiyim@gmail.com nung yokang mesüra Tir Yimiyim bureau tem nung agüjang.

Tepela Tasoba Anogo

Happy Birthday

1. Tenüng :
 2. Tasoba anogo :
 3. Küm : 4. Class :
 5. School :
 6. Talidak :
 7. Salem osang :

NAI-A YA METETTER MA

1973 küm January 28 nü
 30buba Golden Globes
 sentong nung 'The Godfather' atema 'Best Performance in a Motion Picture - Drama' nung actor Marlon Brando (Vito Corleone)-i Best Actor award angu.

SUDOKU # 6105 **TELANGZÜBA # 6104**

3			9	2	5		7	1	7	3	9	6	2	4	8	5
5	9							9	2	6	5	8	4	7	3	1
4		1	5					5	4	8	1	7	3	2	9	6
	7			8	4	9	3	7	8	5	3	9	6	1	4	2
			7	5		6		2	6	1	8	4	7	9	5	3
			1	9		7	5	4	3	9	2	5	1	8	6	7
6			3			4		6	5	7	4	2	9	3	1	8
	5		8	7		9	3	3	9	2	6	1	8	5	7	4
	1	3				5		8	1	4	7	3	5	6	2	9

OJANG LUTEP # 5651

AYASAR :

KIAJA :

RANMEGA :

EPETOKTR :

KASA :

TAJTIUNGBA :

ATKI :

TABEMA :

JAJENNG :

TONTTGTEER :

OJANG LUTEP TELANGZÜBA # 5650

TENSA MAPANG DEN MEPUTEP SENTONG TAPU
 BALALA MASHI MEYANGLUBA TAJUNGBA

TAN HOPTA ATEMA - KOMA SÜLA ?

Q. Covid ajem ya maginürbo magidaksü nunga koma süla ?



January 27, 2022 nü Ranchi nung Adivasi-Moolvasi Aadhikar Manch züngsemtemi longkak aita Jharkhand Chief Minister, Hemant Soren mesüka yangluba noksa rongdokba noksa nung angur. Adivasi-Moolvasi Aadhikar Manch teloki 1932 domicile policy benoka inyaksü aser Bhojpuri aser Maghi ama regional oshitem agientsü akhanger.

Regional security atema Central Asia den amaliteptsüla: PM Modi

New Delhi, Aenjeti/January 27 (Agencies): Region nung security alitsü aser azükaru alitsü atema India aser Central Asia na tsüngda amalitepa inyaksüji kanga tongtibang, ta Brihostibarnü Ato kilonser, Narendra Modi-i metetdaksü. Tang mezüng video conferencing ajanga Narendra Modi leniba nung India-Central Asia senden amenba mapang nung pai, iba region ya India nung 'extended neighbourhood' policy nung kanga tongtibang, ta metetdaksü. Tang Afghanistan tensa

atema-a India aser Central Asia na tsüngda amalitepa inyaksüji kanga tongtibang, ta paisa shisem. "Asenok ajaki Afghan tensa atema tebilemsü akar aser ibaji ajanga region nung tesünep aser security alitsü atema India aser Central Asia na tsüngda amalitepa tongtibang," ta pai ashi. Iba senden nung Central Asia nung aliba linük pongu nungi Tirtem aden. Linük pongu nungi Tirtemji Kazakhstan Tir, Kassym-Jomart Tokayev, Uzbekistan nungi Shavkat

Mirziyoyev, Tajikistan nungi Emomali Rahmon, Turkmenistan nungi Girbanguly Berdimuhamedow aser Kyrgyz nungi Sadyr Japarov nungger liasü. Iba senden ya India nung Republic Day amongba sülen anogo ka lir menogo. Republic Day sentong nung parnok tongti tejaokertem asütsü liasü saka India nung coronavirus wara kanga prokba agi iba sentong nung adentsü atema parnok mejaok. 2015 küm Modi-i Central Asia linük ajak semdanga liasü.

Afghan nem teyari agütsüba maparen nung tetsükdaksü malitsüla: India

New Delhi, Aenjeti/January 27 (Agencies): Afghanistan linük dak sendakba nung United Nations Security Council (UNSC) senden nung jembidang India-i, India linüki Afghanistan nung meimchir temeim dak sendakba teyari agütsütsü, ajisüaka iba maparen nungji tetsükdaksü kecha malitsüla, ta metetdaksü. Indian envoy to United Nations, TS Tirumurti-i, "Onoki Afghanistan nungger nem teyari agütsütsü, aser iba tangatetba nungjagi masetshir," ta metetdaksü.

asere coronavirus vaccine dose million 1 agütsütsü, ta metetdaksü. Taruba ita nungi wheat ji agütsütsü, kechiyong wheat belentsü atema Afghan nungger trucks amshitsü asoshi India aser Pakistan nati bangjemogo. Paisa, "Kidanger ka aser mapang talangka nungi Afghanistan partner ka ama onoki tawa Afghanistan nung tatalokbatem, talisa meimchir dak sendakba tensa tamajungba akümba atema tebilemsü akar," ta ashi. Paisa UNSC dang, Afghanistan nem senotsü teyari agütsütsü tim masüba nung mamshidaksütsüla, iba denji külemi Afghanistan nem agütsüba teyari indangindanga parnok ket atongsüla aser iba maparen nung tetsükdaksü kecha malitsüla, ta metetdaksü.

Tang tashi nung India-i rong asem nung mozü balala den covid vaccines Kabul yimti nung aliba WHO aser Indira Gandhi Children Hospital nem agütsügo. Tirumurti-isa, India-i Afghan nungger nem wheat metric tonnes 50,000 den mozü balala



January 27, 2022 nü New Delhi nung Air India CMD, Vikram Dev Dutt-i Air India office nung Tata Sons Chairman, Natarajan Chandrasekaran agizükba noksa nung angur. Brihostibarnü Air India official súa Tata ket nung agütsügo.

India nung wara süngjemdar saka kümdangtsüla: Health Ministry

New Delhi, Aenjeti/January 27 (Agencies): India tesem kar nungbo coronavirus wara kanga süngjemba temaitsütem lir, ajisüaka maneni kanga junga mita atatsüla, ta Brihostibarnü Union Health Ministry-i metetdaksü. India kübok district 400 nung hopta shia coronavirus positive putetba shilemji 10 dak tema lir, talisa Karnataka, Kerala, Tamil Nadu, Gujarat, Andhra Pradesh aser Rajasthan state tem nung coronavirus kanga putetdar, ta Health Ministry-isa metetdaksü. Ajisüaka Maharashtra, Uttar Pradesh, Delhi, Odisha, Haryana aser West Bengal state tem nungbo wara süngjemdar aser hopta shia coronavirus positive putetba

ajema kümdar. New Delhi nung jembidang Health Ministry nung Joint Secretary, Lav Agarwal-i, "Coronavirus agi shiranger tajemba akümba ajanga oxygen keta aliba yipten aser mesüra ICU nungdakertem ajema kümdar. Tamalen den medemdangra tangbo teshirangdakpurtem aser asürtem tajemba," ta metetdaksü. Wara dak sendakba tenokdangbatem shidak bentsütsüla, ta shia Agarwal-i, January 26 tashi nung district 400 nung hopta shia coronavirus positive putetba shilemji 10 dak tema lir aser district 141 nung hopta shia positive putetba shilemji 5 nungi 10 tsüngda lir,

ta metetdaksü. Tasüngdangba ka langzüdang pai, "Tesem kar nungbo coronavirus wara kanga süngjemba temaitsütem lir, ajisüaka kanga junga mita repranga atatsüla," ta ashi. India nung ano nisung lakh 2.86 dak coronavirus putetogo aser tang teshirangdakpur 22,02,472 lir, ta Union health ministry-i metetdaksü. Tesüba ghonda 24 tsüngda linük nung iba tashidak agi shiranger 573 süogo aser tang tashi nung ajak senteper 49,17,00 süogo, ta Health Ministry-i metetdaksü. Tesüba ghonda 24 tsüngda samples 14,62,261 tendangogo aser tang tashi nung samples ajak senteper crore 72.21 dak tema (72,21,66,248) tendangogo.

Senso shilem 55-i elections atsülangdaksüner

New Delhi, January 27 (Agencies): Coronavirus tensa ano tamajungba akümyonga state pongu nung assembly elections agitsü mapang ana nung lia survey ka agiogo; Local Circles-i agiba survey ka ajanga, senso shilem 55-ibo assembly election ya ita ka mesüra anabosa atsülangdaksüner, ta bushitetogo. Nisung aikati Omicron sub-variant BA.2 atema tebilemsü akar; iba variant ya India nung prok tenzükogo aser election agiba den lokti adenshiba ajanga election agiba state tem nung coronavirus wave tasembuba tenzüksüta akok ta bilemer. Iba survey nung India kübok district 292 nungi senso 10,310-i shilem agia liasü aser parnok rongnung nisung 3,928 bo election agitsü aliba state 5 nungi lir. January 9 nü iba survey nung shilem agir shilem 31-i dang item states nung election atsülangdaksünüa liasü saka January 24 tashi nungbo survey nung shilem agirtem shilem 55-i election atsülangdaksüner, ta Local Circles survey ajanga metetdaksü.

Iba tetezü, tang election agitsü aliba state tem nung coronavirus case timba akümba nung ajemdaker item states nungi survey nung shilem agirtembo shilem 75-i election atsülangdaksüner. Survey nung shilem agirtem timbakati, election mapang lokti adenshiba aser election agiba ajanga coronavirus wave tasembuba tenzüksüta akok ta bilemer, kechiyong eection agitsü aliba state pongu kübok districts shilem 40 nungbo hopta shia coronavirus positive putetba (test positivity rate) shilem 10 dak tema lir, aser hopta shia timba dang akümer. Assembly elections agitsü aliba state ponguji Uttar Pradesh, Punjab, Goa, Manipur aser Uttarakhand state tem lir. January 8, 2022 nü Election Commission-i yimtenren party ajak dang January 15 anogo tashi item states nung roadshows magitsü aser lokti senden magitsü tuyua liasü iba sülen kasa tetuyubaji January 22 tashi atsülang liasü. Election Commission-i maneni wara tensa apir telemtetba agia tetuyuba tasen agütsütsü.



January 27, 2022 nü Patna nung RJD state Tir, Jagdanand Singh den teloktep nung lenirtemi osangbenertem den jembiba noksa nung angur. Railway Recruitment Board's Non-Technical Popular Categories (RRB NTPC) exam mangatetep ken o dak sendakba nung parnoki osangbenertem senden ayongzuka liasü.



Moscow, Jan. 27: Ukraine mechi tensa mejungi aliba mapang Russia-i Black Sea nung drills agia liasü. Black Sea nung iba exercise atema Russia nung raradang amshiba rong 20 dak tema aser item den yaritepba rong tem parnok alidak nungi ogo, ta Russia indang Defense Ministry ajanga Bodhbarnü ashi.

North Korea-i ano missile ana tendang

Seoul, Aenjeti/Jan. 27 (Agencies): North Korea short-range ballistic missile mesük ana tzüym nung khaloktsü, ta South Korea aser Japan-i Brehostibarnü ashi. Pyongyang-i par tsükchir ta ajaba United States nungi kumzuka alitsü asoshi nok-o-nü tendangba maparen tali akumer.

South Korea indang Joint Chiefs of Staff (JCS) ajanga iba osang ya text message nung osangbener dang shia liasü, koba tan ita trok buba alitsü.

Iba missile tendangba ya linük anüdoklen tzükum nung aliba Hamhung yimti nungi anepdang 8:00 ako meta puteta liasü, ta Joint Chiefs of Staff (JCS) ajanga ashi. Missile ya anünglen kilometre 20 shi tur meta kilometre 190 shi ao.

"North Korea inyaksangshi

dak sendakba nung asen mitkartem saksalema aser renemshia lir," ta JCS ajanga osangbener dang message nung ashi.

Japan nung Ato Kilonser Fumio Kishida-i ashiba agi, sorkari iba tatalokba indang osang tejangja bendenba mapang lir, saka ballistic missile tendangba ajak atema sasar aser United Nations Security Council pangzüng nung aibelenba ka lir, ta ashi.

Tan ita Pyongyang-i missile aika tendanga arur aser item rongnung cruise missile, nokdanga aliba ballistic missile aser hypersonic missile tem dena lir. Parnokisa par sasa khen atema anena aliba nuclear aser long-range missile tem tendangba maparen tanaben tenzüksü amai olen kar shia liasü. Item inyaksangshi ya UN

pangzüng agi memelar. United States aser South Korea nati North Korea dang denuclearisation atema maneni jembishinütsü ajungshir, koba Hanoi nung 2019 kum Kim Jong Un aser taoba US Tir Donald Trump na tsüngta senden amenba nung telemtetba tajung ka magiteti anena lir.

Taoba kum US tir akumba sülen Joe Biden lenisüba kübok US-i North Korea den tesem mashi nung aser mashi mapang jembishinütsü molunga lir, ta jembitena arur.

Pyongyang-i rara ayongba yimya amshiaka Biden indang administration-i atsü-anem akar. 2017 kum North Korea-i nuclear tendangba aser intercontinental ballistic missile (ICBM) tendangba mapang Kim aser Trump tsüngta mezüngmeshi o jembia liasü.

Syrian shibelener den khatepdang Jordan mitkari nisung 27 khaset

Amman, Aenjeti/Jan. 27 (Agencies): Jordan sepaitemi kidanger Syria linük nungi aittsü merangba shibelener nisung 27 khaset aser temesepba mozü bena alir kar Syria-i meyipa ao, ta ashi.

Jordan army indang website nung Brehostibarnü osang ka sangdongba nung Syria nungi temesepba mozü shibelentsü merangba telok kar aridok aser tesem balala nung narcotic aika apu aser nisung aika yiru, ta shia liasü.

Jordan indang border crossing tongtiba ajanga Syrian truck tem aoba nung temesepba mozü aika ngutet, ta mitkar temi ashi.

Ozüng tasenba maneni amshir aser arütsü wazüka ayutsü mechi ozüngi memelai arütsü alema aiter mesüra shibelener nokdangtsü asoshi tashi ajunga amshitsü, ta parnoki ashi.

Ita tetenzüklen Syria den arütsü anasa shibelener den khatepba mapang army ketdangsur ka khaset, ta Jordan mitkartemi shia liasü.

Jordan nung Syrian refugee 650,000 dak tema lir, shirnok par lima nung civil war adoker kum ter dak tema aruba mapang jena aruba alitsü.

Jordan arütsülen Syrian sorkar meyong sepaitemi sorkar anemer kübok aliba tesemtem agiba sülen

September ita Syria aser Jordan ketdangsur tsüngta border security atema jembishinüa liasü.

Ita ka lir Jordan indang King Abdullah II-i Syria Tir Bashar al-Assad den jembia liasü, koba linük ana tsüngta border crossing tongtipang ka tanaben lapoker kum ter shi nung mezüngbuba jembiba alitsü.

Civil war tenzüker kum ter shi aruba mapang Syria nung ozüng alema temesepba mozü yangluba industry züina akumer. Tang Syria ya captagon temesepba mozü yangluba aser ayokba tesep ka kumogo.

Middle East aser talisa nung temesepba mozü shibelenba nung Syria aser Lebanon ya tongtipang lenmang ka kumogo.

Lebanon nung Iran-i busemba Hezbollah telok aser danga telungpur telok temi temesepba mozü shibelenba mapa inyaker, ta Jordan ketdangsurtemi ashir, saka Hezbollah-i iba taitisüba magizüker.

Middle East nung amphetamine market ulua akumer aser alima nung amphetamines (captagon) apuba shilem 55 dak tema Saudi Arabia, Jordan aser Syria nungi lir, ta United Nations Office of Drugs and Crime ajanga 2014 kum report ka nung shia liasü.

Ukraine atema Russia-i akhangba US-i magizüker

Washington, Aenjeti/Jan. 27 (Agencies): Russia-i kidanger Ukraine linük amaktsü akok, ta temolung melemteteti aliba mapang Ukraine ya NATO nung metendaktsütsüla, ta Russia-i akhangba US-i magizüker.

Ukraine tebilemstü asoshi Russia-i akhangba nung Secretary of State Antony Blinken-i telangzüba agütsüba mapang iba osang ya metetdaktüsü.

Blinken-i temelaba kecha magütsü saka Russia-i shimtsü asoshi linük ana tsüngta tejakleni aoba tangatetep lenmang ka agütsür, ta ashi.

Blinken-i telangzüba agütsüba ya Tir Vladimir Putin-i asadangtsü, ta Russia indang foreign minister Sergei Lavrov-i ashi. NATO military alliance den osang agiteper US-i langzüba nung iba alliance ulushia akumba atema Russia-i süoki ia bilemba indang shia mali aser tasüngdangba kar nung jembishinü aka tenzüksü teimla agütsür, ta Lavrov-i ashi.

Russia tir indang odongtar Dmitry Peskov-i osangbener dang ashiba agi, Russia-i arrsanga masadangtsü aser iba telangzüba mapang agia shisadangtsü.

NATO ulushia akumba aser iba dak sendakba security tebilemstü indang Russia-i tezüluba nung agüja liasü. Item rongnung Ukraine aser danga linüktem tarutsü nung NATO nung metendaktsütsü asoshi telangzüba aginüa liasü.

Tawa Ukraine arütsülen Russia-i par sepaia aika yoka lir, aser iba ya Ukraine amaktsü asoshi renemshiba ka amai Western linüktemi ajitetet. Saka Russia-i iba ama sentong kecha mali, ta ashir.

US telangzüba nung asen temolung taroktiba nungi angatetba jangja shiogo aser yangji Ukraine indang sovereignty aser NATO ama security alliance tem nung shilem agitsü par dak temeden lir, ta Blinken-i ashi.

"Linük balala den tesendaktep indang nung süoki ia agizükba nung temolung melemtettsüsa malitsüla, aser asenoki Ukraine indang defence tashi itshitsü atema kasa temolung agütsür aser tarutsü nung Russia-i tashiyim amshira lungjemer telangzüba agütsütsü renemer," ta pai ashi.

"Telangzüba agütsütsü asoshi Russia dak keta lir. Onok lenmang anaprong nung renema lir," ta pai ashi.

Secretary of state-i ashiba agi, tan hopta US-i rong asem nung mitkar teyari yokogo aser yangji Javelin missiles aser anti-armour weaponry den injang-bomb aser hadir tonne noklang aika dena lir.

US aser par European tembar linüktem tsüngta mangatetep kecha mali, ta

Blinken-i ashi. NATO ajanga par tangatetba renema lir aser ibaji ajanga aseni bilemba nung tashi ulushir, ta pai ashi.

Saka US document ya yimjak nung mesangdongtsü.

"Telung nung jembishinütsü atema aseni maongka agütsüra tangatetep nung takok angutsü maongka junga lir," ta Secretary

of State ajanga ashi.

NATO Secretary General Jens Stoltenberg-ia alliance indang document ya Moscow nem agütsüogo ta ashi aser Russia tebilemba angadangtsü molunga lir, saka security tsütsü linük ajak pei temeden lir, ta paisa shisem.

(Maneni tapak 9 nung...)



Beirut, Jan. 27: Lebanon yimtiba, Beirut nung electricity supply agreement nung meyongnem agütsüba mapang tangokba noksa ka yangi angur. Lebanon aser Jordan na tsüngta Bodhbarnü tezüngzüktep ka agiba nung Jordan-i Syria ajanga Lebanon nem electricity agütsütsü. "Syria teyari nung Jordan nungi electricity 250 megawatts angutsü. Iba yagi Arab linüktem nung tesendaktep tali ulushitsü," ta Lebanese Energy Minister Walid Fayad-i iba sentong nung ashi.

MULUNGNEŃ O



09-12-1958

17-01-2022

Onoki teti dang meima aliba asür **TEMJENWATI** (Chungtia), shirangba mapang nungi akümüli temer aoba tashi nung adianu shirnokisa nübu, rongsen, shisatsü aser tamang sarasadem agi yaritepogo, nenok ajak dang kanga pelaba lemsateper.

Nenok mapa tajung asoshi Teyanglur Tsüngremi moajang ta ozü sarasadem.

Temeim Kinungtsü, Chirnur & Kinungertem.



26 Aonglenden Assembly Constituency NDPP Mokokchung Frontal ana den Hon'ble Speaker, Sharingain Longkumer densema mensem ka 24th Jan, 2022 anogo nung mena liasü aser maneni party tashi itta aotsü bangjemtepa asen lenir Chingwang konyak aser Neiphü Rio lenisüba kübok taruba küm 2023 General Election nung Sharingain longkumer tashi ajak agi yaritsü 26 Aonglenden A/C NDPP ajanga lemetta nüburtem dang sangdonger.

Sd/-

Nungsangmeren Ikr, President

Sd/-

L. Tamsu Jamir, Secretary Org.

Office of the
MONGSENYIMTI SENSO MUNGDAŃG
B.P.O MONGSENYIMTI P.O. CHUCHUYIMLANG
DIST: MOKOKCHUNG NAGALAND-798614

KHONANG TETUSHI AGÜTSÜR

Terenemtet, tesüngjem tekümdang senso tajung Wb. Imtimeren NPS, Addl. S.P. Mokokchung (Wb. Nungshiakum aser Wt. Chubanaro. Imti) jabaso ajanga pa tatah wadang nung tasüita bendanga agüja sorkar aser nubur tenzükba maong 'Nagaland Governor's Commendation Certificate' taküm 73 Buba Indian Republic Day sentong akadang nguteta sensosanger ajak nümadangtetdakja khonang tulu bener arutsuba tetushi tulu lenir nem sensosanger ajaki agütsür.

Takoteter aika rongnungi alakteta shimteta agütsüba sempet ozü senso tajung nem agütsüba atema Nagaland Ahng aser Nagaland sorkar dang pelaba lemsateper.

Tsüngremer leniba aser taochi, asen nübur tejakleni ochishia anitsü nüngtem nung lenir madak teti molamoshia lidakjangma.

Sd/-
(IMOTONG)
President
MSM

Sd/-
(OBANGONEN)
Secretary
MSM

ALI AYOKTSÜ LIR Nihokhu village (Foothill Road nungi 2 meter)
Sq. ft nung Rs 30
Contact: 8974869756 / 6909596955

Office of the
AO SENDEN LITERATURE BOARD (ASLB)
MOKOKCHUNG - 798 601, NAGALAND

KHONANG TETUSHI AGÜTSÜR

Wb. T. Senka Ao, shibai Aor Kaketkeno, Oshioben aser Shisaliokren nung India ajunga nungi pa-a ka züngsema iba tematiba khonang senpet "Padma Shri" ajangzükogo ya asoshi Ao Senden Literature Board tenüng nung tetushi tulu agütsür. Maneni Aor Kaketkeno aser Oshioben nung yaritetsüsa Tsüngremi lenir taküm arishi moajangma.

Sd/-
Dr. L. Temjen Jamir
Chairman, ASLB

Sd/-
I. Temjen Tzüdir
Secretary, ASLB

Ukraine atema Russia-i... (Tapak 8 nungi...)

Russia indang arütsülen rakzüka lir. NATO tashi ulua akumba indang asüngdangba mapang, Stoltenberg ya asangsang nungi pilaogo, ta Russian Foreign Minister Sergei Lavrov-i Bodhbarnü shia liasü.

"Mapang talangka nungi pai jembiba kecha ni magizüker," ta Lavrov-i Russian parliament nung osangbener dang ashiba social media nung live sayua liasü.

Kasa mapang Russia, Ukraine, France aser Germany nungi diplomats temi mapang talangka nungi Ukraine nung ceasefire züngzüktep yanglua aliba nung tanaben akangshia züngzüktep, koba agi Ukraine nung Russia-i yariba sorkar anemer temi anüdoklen Donbas region nung alinük kar

2015 Minsk agreements dak sendakba danga onüktem nung tebilemba balala liaka linük pezüprongi maneni ceasefire busemer, ta France tir ajanga sangdong ka nung ashi. Kremlin indang deputy chief of staff Dmitri Kozak ajanga Paris nung ghonda ti jembishinüba ya kanga tongmelang masü aser iba telok ya hopta ana tsüngta Berlin nung ano ajuruteptsü, ta ashi. Berlin nung arua jembishinütsü asoshi Russia-i telemtetba agiba ya osang tajung lir, kechiaser hopta ana Russia ya tangatetep lenmang nung jajatsü, ta Ukrainian foreign minister Dmytro Kuleba-i osangbener dang Bresthostibarnü ashi.

Government Polytechnic Kohima nung training agitsü atema jaoker

Dimapur, Aenjeti/January 27, 2022 (TYO): Government Polytechnic Kohima nung 'Short Term Training' agitsü atema Government Polytechnic Kohima, Principal-i janrar alir candidate tem jaoker.

Community Development Through Polytechnics (CDTP) scheme kübok item course ya angati agütsütsü, koba Ministry of Skill Development & Entrepreneurship (MSDE), Government of India ajanga iba training atema senotsü teyari agütsür.

Sl. No.	Name of the Course	Duration	Eligibility	Intake Capacity	Commencement of classes
1	Computer Hardware and Networking (Basic)	3 Months	Class 10 passed	30	7/02/2022
2	Carpentry and Furniture Making	1 Month	Class 8 passed	30	7/02/2022
3	House wiring	1 Month	Class 6 passed	30	22/02/2022
4	Baking and Confectionery	1 Week	-	30	15/02/2022

Tongtibang Tetuyubatem:

1. Course ajak atema tama arurtem nem mezüng admission agütsütsü.
2. Registration fee sen. 100/- agitsü (one time).
3. Registration mapang Aadhaar Card indang Photo copy aser Passport photo sayutsüla.
4. February 01, 2022 nungi Registration tenzüktsü.

Maneni, iba osang dak sendakba nung osang tejangja agitsü atema, Mobile Phone: 9862376252 (Coordinator) mesüra E-mail ID: principal_gpk@yahoo.com nung tongtepratepang.

Jake Gyllenhaal-i 'Cut and Run' nung shilem agitsü

Los Angeles, Aenjeti/January 27, 2022 (Agencies): Hollywood star Jake Gyllenhaal-i taruba heist thriller film - 'Cut and Run' nung tongti shilem agitsü terenemba lir.



John Glenn-i züluba script ka nung ajemdaker iba film yanglutsü. Film talisa Eagle Eye, Law Abiding Citizen aser Clash of the Titans atema mapang balala nung John Glenn-i script zülutsüba ajaki jangjaa lir.

Variety sangdong ka ajanga angazükba agi, mapang talangka company balala den bid süa arur sülen, New Republic Pictures-i iba film yanglutsü

shilem agiba den külemi, pa meyong company - Nine Stories Productions ajanga iba film produce asütsü. New Republic ngutetsang Brian Oliver aser president Bradley Fischer nati Glenn den longjemer iba film produce asütsü.

Tawa, Gyllenhaal-i Netflix movie - The Guilty nung shilem agiba nguogo. Iba film ya Antoine Fuqua-i direct asü. Cut and Run dak alaka, Gyllenhaal-i Michael Bay indang Ambulance nung Yahya Abdul-Mateen II aser Eiza Gonzalez na den külemi shilem agitsü sentong lir.

Madhuri Dixit indang 'The Fame Game' February 25 nung sayatsü



Mumbai, Aenjeti/January 27, 2022 (Agencies): Madhuri Dixit indang mezüng OTT project - 'The Fame Game' series ya Netflix nung February 25, 2022 nü sayatsü. Iba series nung actress Madhuri-i Anamika ta nungja agütsüba superstar ka shilem agir.

Instagram sabang nung actress Madhuri-i 'The Fame Game' indang noksa ka den Netflix nung iba series sayatsü anogo osang lemsatepa liasü.

'The Fame Game' atema showrunner aser writer ama Sri Rao aser director ama Bejoy Nambiar aser Karishma Kohli nung longjemer inyakogo.

Iba family drama nung Madhuri dak alaka Sanjay Kapoor, Manav Kaul, Lakshvir Saran, Suhasini Muley aser Muskaan Jaferi nungeri tongti shilem agiba angutsü.

Tudum sentong, koba taoba küm Netflix ajanga alima tesem ajunga nung fans atema ayongzükba liasü, iba sentong nung Madhuri Dixit indang drama osang lemsatepa liasü. Iba mapang Madhuri indang drama (The Fame Game) ya 'Finding Anamika' nungja agütsür liasü.

2019 küm Karan Johar-i iba series yanglutsü atema osang sangoktsü. Karan Johar indang Kalank nung Madhuri-i tesüsa shilem agiba nguogo, koba 2019 April nung saya liasü.

Yajang 'C' A Team-i 25buba Yajang United Cup kokogo



25buba Yajang United Cup (Volleyball) takok angur Yajang 'C' A Team puri takok marok amer iba asayamung ketdangpurtem den külemi tangokba noksa nung angur.

Yajang (Mkg), Aenjeti/ January 27, 2022 (TYO):

Yajang United Cup ketdangpur ajanga Yajang 'C' (Compound), Local Ground nung Hombarnü (24.01.2022) nungi tenzüka Bodhbarnü (26.01.2022) tashi "Tarutsü Teimla" omen nung ajemdaker '25buba Yajang United Cup - Silver Jubilee' Volleyball asayamung ayongzüka liasü. Iba asayamung nung 13th NAP IRB densema Yajang (A, B, C, Model Village) yimtsüing nungi team 11 agi shilem agiogo.

Lanurtem saisapong tsütsü ajungkettsütsü aser tejakleni odaktsütsü nükjidong nung United Cup Volleyball asaya liasü.

Iba asayamung lapokba sentong nung tongti tesemdang ama Minister of Higher & Technical Education & Tribal Affairs, GoN, Temjen Imna Along dena liasü.

Yajang kiyong pezü nung alir lanurtem nem sabang agütsütsü nükjidong nung iba asayamung ayongzüka atema Minister Along-i United Cup tayonger/ ketdangpur dang pelaba metetdaksü.

Pei sempet tajungba arangshitsü atema iba asayamung maongka ama agitsü asoshi Along-i asayarterm ajungshia liasü.

Iba asayamung ya league system nung group pezü lemsar asaya liasü. Tanünübuba (Mongolbar) league round nung team asem tsükba sülen team 8 quarter final tongtetta asaya.

Tasemnübuba nung team pezü - "13th NAP IRB vs Yajang 'C' A Team" aser "Yajang Model Village vs Yajang 'B' A Team" tsüngda semifinal asaya liasü, kong Yajang 'C' A Team aser Yajang 'B' A Team nati pei pei tata asaya takok ngua final tongtet.

Iba asayamung final nung Yajang 'C' A Team-i Yajang 'B' A Team tsükdakja 25buba United Cup Volleyball trophy takok angu.

Kasa asayamung 'third place' atema Yajang Model Village aser 13th NAP IRB tsüngda asaya liasü, koba Yajang Model Village-i koktet.

Iba asayamung shibangba sentong nung taoba mapang Minister, Dr. Benjongliba Aier

tetushi tesemdang ama dena liasü.

25buba Yajang United Cup takok angur - Yajang 'C' A Team nem takok marok den senpet 20,000 aser certificate agüja liasü. Runners-up team - Yajang 'B' A Team nem senpet 15,000 den certificate aser tasembuba jenjang nung takok angur Yajang Model Village nem senpet 5,000 den certificate agütsüogo.

Iba dak alaka, asayamung nung alakteta shilem tajung agir nem nija sempet (individual award) agüja liasü, kong Yajang 'C' - A Team nungi Takoyapang-i 'Best Setter'; Imkongtenzüki-i 'Best Attacker' aser Yajang 'B' A Team nungi Talitemjen-i 'Best Player' award angu. Ano, 13th NAP IRB Team nem 'Best Discipline Team' award agütsü.

Maneni, Yajang United Cup tenzüker (1997) külen nungi küm 25 tashi renteta aruba jubilee mong tenüng nung, yimtsüing nungi District aser State level tongtetta shilem agir asayar asem - (1). Watinüken, (2). Imkongtenzüki aser (3). Lt. Imnawapang (Posthumous) nem award agüja liasü.

Atuo Tevo-i 60buba SASA - Naga Wrestling kokogo

Kohima, Aenjeti/January 27, 2022 (TYO): Brehostibarnü, Kidima yimtsüing nungi Atuo Tevo-i 60buba Southern Angami Sports Association (SASA) annual sports 2022 indang Naga Wrestling asayamung kokogo.

Iba asayamung final bout nung Tevo-i Ruokuovituo Lese (Mima village) tsükdaktsü. Kasa tetoktepba nung Neithongulie Kuotsu (Phesama village) aser Sweyiekul Khatso (Jakhama village) nati 3buba aser 4buba jenjang nung takok angu.

Par pezüprongla nem senpet 80000, 60000, 40000 aser 20000 agütsütsü.

Wrestling asayamung quarter final nung tamakok angur pezü:- Ketoulhou Mejura, (Phesama) Mhaneikhohie Kuotsu (Phesama) Kekhrrie Yhoshü (Kigwema) aser Kedolhousie Kuotsu (Phesama) nung nem senpet 5000 agütsütsü.

February 04, 2022 nü 60buba SASA annual sports meet shibangba sentong nung parnoki item senpet agizütsü.

Iba asayamung lapokba sentong nung, Advisor for Youth Resources and Sports, Zale Neikha dena liasü.

Tenyemi telok asem dak alaka, tanga tesem nunga Naga Wrestling asaya nungtugu kümdaktsütsü asoshi Neikha-i metetdaksü; ajiasünungang akhi tetsü-tebo mapang nungi asaya aruba sobaliba saisapong mesamai tejakleni bener aotsü, ta pai ashi.

Neikha-i ashiba agi, Naga style wrestling ya alima tesem balala (international) nung asayaba wrestling asayamung den kasa lir aser Olympic nunga iba asaya jangjatetsü imlar, koba Naga nung dak wrestling asayatsü sempet tajung lir.

Saisapong koba südir süaka, akhi ama kuli küptok ka atema dang masayar, ibayongji 'profession' ka ama saisapong nung temulung agütsütsü asoshi pai telok ajungshia liasü.

Anungji, pei dak aketba sempet tajungtiba amshia state aser linük nem tenüng tajung

bener arutsütsü asoshi meranga inyaktsüla, ta Neikha-i lanurtem ayongzüki.

Advisor Neikha-isa, State nung lanurtem ajungkettsü aser sports infrastructure tajungtiba yanglutsü atema Chief Minister Neiohiu Rio akhüm nung sorkari meranga inyakdar, ta metetdaksü.

Saisapong nem sabang tajungba aser parnok nem mapa maongka agütsütsü nükjidong nung Nagaland mini Olympic asayamung yakta ayongzütsü asalentong yangludat, ta pai metetdaksü.

Alima ajunga asüngba COVID-19 wara süshia mao asünung, mapang shia COVID-19 dak sendakba meratem nung anidaktsü aser pei den tangara iba wara nungi kümzüka ayutsüsa tali kümdanga alitsü asoshi Neikha-i telok ajungshia liasü.

Maneni, Hokolbarnü (28.01.2022) Local Ground nung Junior Wrestling aser Indoor Stadium nung Badminton aser Table Tennis asayatsü.

Sür küm 2 ajungba Menungra Bilemteter



Asür. MRS. K. MERENLA [28/01/2020]

Oja,

Küm ana tejakdang, iba anogo nung nai onok toktsür Kotak nung teti atema anisüngzüki ao.

Ola madoki nüktzü yima anogo ka danga na memenungrai aser nü indang mejembii mesür. Nai onok dang Temeim sayuba aser onok nem taküm tesayubatem agütsüba ajanga onok anogoshia liyonga aoer. Temolung raksar saka na Yisu den lir ta asüba tangatetba ajanga onok molung nung tesünep angur.

Asenok majuruteptashi.

Nü temeim Kinungbo aser Tanurtem.

2buba Lt. G. Rio Memorial U-19 (Boys) Inter-District Tournament osang

Dimapur, Aenjeti/January 27, 2022 (TYO): Brehostibarnü Nagaland Cricket Stadium nung '2nd Lt. G. Rio Memorial U-19 (Boys) Inter-District Tournament' asaya liasü.

Iba asayamung tasemnübuba nung Kohima aser Kiphire asayaogo, kong Kiphire Boys U-19 team-i toss koka batting shim. Ajisüaka, parnoki kanga mejungi asaya tenzüki aser wicket atonga tukadokba sülen over 16.2 nung run 43 dang yanglur ajak out süadok.

Kiphire team nungi batter rongnung Surjay Bahadur-i dang run timba (10 runs) yanglutet.

Kohima atema bowler Samuel Zaputou-i wicket pungo agia liasü. Samuel-i over 7.2 nung run 11 dang agüja wicket 7 out sütsü.

Tanabuba innings nung, Kohima U-19 Team-i ayong ayonga dang over 5.3 nung alizüing tongtetta wicket 10 agi iba match koktet.

Kohima atema batter Seyievizo Zaputou run 25 yanglua liasü.

Kasa anogo, Dimapur aser Zunheboto team tsüngda tanabuba match asaya liasü. Iba match over 20 tashi ajemer asaya.

Dimapur team-i toss koka Zunheboto team nem mezüing batting asütsü lezmükja liasü.

Zunheboto team-i over 19.3 nung run 73 dang yanglua batter ajak out süadok.

Zunheboto team nungi Sonu Kumar-i run 19, Nihuto-i run 17 aser Bekuto-i run 11 yanglua liasü.

Dimapur team atema Aloto Sumi-i wicket 2/2 (2.3 overs), Keduowhetuo-i wicket 2/12 (3 overs) aser Khrievitso Kense-i wicket 2/25 (4 overs) agi.

Tanabuba innings nung Dimapur team puri over 10.2 nung alizüing tongtetta parnoki wicket 9 agi iba asaya takok angu. Dimapur team nungi batter Sujal Prasad-i run 25*, Mughavi Sumi-i run 20 aser Yugandhar-i run 12* yanglutet.

Zunheboto atema bowler Oloka-i wicket ka agia liasü.

****TEMETETTSÜ:** Tanü Pool - A match tembangogo. Pool - A Table nung Dimapur Team-i temaba jenjang tongtetogo aser parnok Final-i iogo. Pool-B nung temaba jenjang tongteteter team-i Dimapur team den February 02, 2022 nü final asayatsü.

Maneni, Pool-B nung Wokha, Peren, Mokochung aser Tuensang dena lir aser Pool-B asaya January 29, 2022 nungi tenzütsü.

***POOL-B MATCH (29-01-2022)**

- WOKHA VS PEREN (NAGALAND CRICKET STADIUM)

- MOKOKCHUNG VS TUENSANG (SOVIMA CRICKET GROUND)

MDCA Inter-club T20 asayamung Feb 7 nü tenzütsü

Dimapur, Aenjeti/January 27 (TYO): 30buba Mokochung district Cricket Association (MDCA) Inter-club T20 tournament February 7 nü nungi tenzüka Imkongmeren Sports Complex nung asayatsü.

Asauamung nung shilem tir Imlikumzuk-i sangdong ka agitsü atema form tem January

27 nü nungi tenzüka S.I shop (The Restaurant tsüinglanglen) nung angutsü. Tejangrartemi osang tejangjaba agitsü atema item number: 9366834330/8131860677 tem den tongteprateptetsü, ta MDCA asayatsü.

BILEMDANGANG

"Ochi mulungjang ateneri pei asoshi külakzüka mayur."